

敬業堂詩集

函一

十

冊

敬業堂詩集卷九

海寧 查慎行 悔餘

春帆集

盡戊辰
一年

客京師忽四年戊辰二月以外舅陸翁抱恙扶侍
南歸水程濡滯凡四閱月舟中多暇以詩送日翁
雖手顫不能執筆每口授余書見余作又未嘗不
色喜也到家後周旋湯藥余亦無詩矣

將出都前輩及同學多有贈行之句短章酬別
朝市山林跡總賒又扶病叟出京華一卮北酒春傷別
幾度東風客負花草色青回來城路凍痕白退隔年沙
多情通潞亭邊水穩送歸航直到家

衛凡夫郎中索題詩冊兼志別

雞鳴九衢曉城角轉星斗不忍去長安此中多好友友
亦不在多同心十八九釀錢錢歸人宴會連夕有下車
揖戴笠古道君尤厚君家好門庭清不借箕帚堂前兩
株藤植自相國手凡夫所居卽文清公舊邸春花紫蒂簇秋實明珠
剖我來婁泖洄晨對或終酉有時咲捉鼻隨意語脫口
纏綿示君真坦率成我醜如此兩換年未覺日月久君
行入郎署約畧歲紀丑風流白雲司下視牛馬走讀書
兼讀律楷萃等枷杻賦性非所便時時夢田畝今春始
轉秩望出曹郎右好理舊襟懷依前向詩酒我行惜薄
遽唱和少于喝此地最難忘臨歧幾搔首

梁藥亭以端溪紫玉硯贈行

吾家老詩翁

家二贈兄

遠寄數挺墨行裝無好硯一試那易

得前年送君歸許我端溪石匆匆過三年此語時在臆

夜聞君到京壺漏下初刻入門異彩發君故不自匿欣

然咲相謂前諾幸免食開囊把贈余理賦不容拭何來

琉璃匣養此馬肝色餘潤吐紫烟燈光忽被蝕吾弟

尹德

兩踰嶺嗜好癡已極曾拋金珠裝蓄硯比封殖窮搜願

難滿妍醜庶能識亦云此石精溫潤含玉德忽然落吾

手匆睨三太息物歸洵有數在獲詎須弋奈無十五城

豈易償拱璧君才本閭世海嶽鍾竒特仙人五色裙來

跨鳳皇翼飄飄凌雲賦一一好句逼留以供濡毫揮洒

固其職顧蒙謬許與降氣自摧抑我詩苦非豪邊幅守
封洫近來尤懶惰故步荒學植得錢了應酬例取加粉
飾詆媒人挾喙描寫腕無力徒然辱佳惠胡取三百億
逝將返柴荆稍稍闢畛域門前一溪水潑眼清湜湜洗
硯先洗塵有如苗去賊學書兼學字尚覲名副實持君
贈行具寫我長相憶因之謝吾宗墨點漆光黑

茨棘

牛李仇初作張陳望苦深全憑翻覆手大負始終心苑
柳傷餘蔭飛鷗誤好音誰非門下客茨棘莽成林

曉出沙窩門

草綠國東門舊來送行處今朝一鞭出喜赴歸人路麥

隴春未耕杏園寒尚冱水槽沮洳濕鵝鴨各引唳遠氣
如湖光蒸蒸動原樹長空豁遐矚變景失回顧不復夢
春明三年墮雲霧

張灣舟夜寄德尹都下

漁汀鳧渚夢依稀長是思歸未得歸底事得歸猶悵望
可憐倦羽又分飛

發舟後連遇逆風間或阻淺兩日纔行十里許
遠歸決所從筮易利涉川意亦厭馳逐捨車遂乘船何
期初放溜斷渡春風顛罟師邪許聲蟻附百丈牽進尺
旋退咫膠淺不得前廢闌二十四一一淤泥填郵籤箕
南程約略踰三千一日行五里到家須兩年誰能侶鳧

雁久望烟波間

曉起回望西山

好山隔黃沙隱隱一重霧霧斂日紅時螺青出高樹

郭縣晚泊

鷗鳥灣洄泊小舸蘆溝西望樹周遭殘冰裂石頽兼岸
春水如油滑上篙老柳耐寒如許瘦壤垣經久不多高
畫眉塚冷鷹臺塌一片斜陽雁下壕

舟夜書所見

月黑見漁燈孤光一點螢微微風簇浪散作滿河星

打魚莊遇西塞公歸舟述舊有作

長安棋局莫深論秉燭依然近酒樽烟火一帆春去國

關河雙鬢雪添痕嘗竈宦味經調鼎羅雀交情散署門
記取故人垂老別病歸猶感向時恩

時余同外舅附楊少司馬歸舟

口占送陳仲夔舍人還都

別語無多別恨新短橈明發指天津殷勤百里猶相送
萬疊西山一故人

亂鴉

白項非無種烏頭亦有名野田畝點點古墓去程程陣
忽遮天暗貪因得食爭君看稻梁雁失次敢先行

自王家浦晚至楊村驛

土屋多依堡民屯半屬官樹從王浦密河過蔡村寬鷗
外新蘆茁犁頭細麥攢蒲溝行未到月黑夜漫漫

荀業堂詩集卷九
三月朔日 先君子忌辰

昨夜還家夢依依白髮親覺來三月朔又感一年春窻
空悲何地飄流愧此身那堪寒食近南望獨沾巾

桃花寺

已過桃花口再問桃花寺獨客扣門來老僧方坐睡欲
知春淺深但看花開未

掛帆行

船頭船尾收鐵猫三尺五尺堆銀濤弓張帆腹機激箭
原樹却走如奔迯西山已沒烟霧裏初日欲吐春雲高
須臾倏達直沽岸風勢未已猶颺颺當前有關敢飛渡
又向津頭卸帆住

天津關用薛文清舊韻

地勢東來一掌平，忽開官閣起崢嶸。
風腥曉市知魚賤，客過嚴關喜篋輕。
暮雨暗添丁字水，春陰低壓直沽城。
雲帆轉海非難事，誰念東南物力傾。

三月三日寒食舟中風雨感懷都下舊游寄朱公子恒齋从部三十六韻

愁中時序兼百六，又重三客路流光。
感京華節物，諳尚書期不遠，別墅興尤耽。
憶昔春城外，陪遊小築南。
年年修禊事，往往盍朋簪。
土甌茶開箬，泥封酒拆壘。
羽觴佳客泛，蠻榼小童擔。
苞愛丁香破，梢宜豆蔻含。
地衣紅匝，匝石髮翠，參參笋擘斜行。
雁絲清獨，繭蠶隨方呈妙技。

即事借深談雜座門生列巾車野老參幾家同上塚隨
意去停驂一院鞦韆女干場蹴鞠男花遊聯竹轎芳信
簇筠籃候煖鶯吭滑烟濃蝶夢酣種桃尋紫陌看杏入
茅菴隔日頻相約先期或預探柳花登客饌帶草拂僧
龕沙徑晴熏轉澄波曉鏡涵錫簫吹寂寂粥鼓報齋齋
到必移吟笈歸仍側帽簷撲翻愁墮鞦韆豪健咲驅驥後
輩忘形接先生好士貪清狂真辱愛疎略總無慙好會
原難數傷神忽不堪東山俎謝傅西路避羊曇故業留
桑梓佳城閉栢楠詩曾傳魏野曲忍聽何戡只益窮途
苦寧知世味甘無人臨曲水有淚滴春潭岸濕烏銜紙
船空鼠匿甌風鳶行斷續檣燕語詎謫野意將舒綠川

光未放藍離情風挾絮往事霧沈嵐此恨郎君識緘題
寄北函

舟晚

晚色一天霞空明炫眼花濁流供飲犢新月領歸鴉野
曠風長急塘迴路向斜兩三人待渡此去必村家

白廟

一院槎枿樹居僧守鵲巢俗貧稀賽社瓦缺只編茅暗
處蟲絲接塵邊鼠迹交漁人來寄網時有一船梢

泊頭鎮見杏花

澹烟消處日初銜酒旆微風到布帆我自偶從花底過
不勞蝴蝶上春衫

交河道中聞人稱河間縣政績之美輒述其語

寄彭椒崑明府

客經新橋驛泊舟交河湄偶逢垂白叟借問邑宰誰蒞
茲凡幾年當官何設施叟置不一荅別舉已所知爲言
河間府畿南極衝疲兩州十五縣首縣又難治黃昏簿
書交白晝羽檄馳四野雜莊戶土著留子遺責之辦賦
稅肉盡空腔皮可憐牧民官往往猶鞭笞追呼力不任
竄身并歸旗方將計囊橐焉問疾苦爲前年來好官忠
信神明慈聞官乃彭姓門第江南推祖父盡公卿家業
貧難支到官但飲水一意存撫綏不承上司喜不顧同
列嗤不假左右手不煩誥誡辭赤子視吾民子忍父母

欺卽如春夏交輸課有常期蓼蓼三堂鼓出早退每遲
文書赴期會閒暇無停披木甌設中央金錢隨所齎吏
前但執算毋許參一詞一日投百封數計若察眉半月
率滿匭封識宛不移明朝上大府手不沾毫釐自餘了
無事止酒或賦詩官清民力寬漸漸歸流離以來俗大
變迥絕非曩時朝廷方勤民下問劾諷咨大府昨薦達
某官轉高資分明馴雉歌載在墨吏碑坐令惠愛政平
平覺無竒誰能持此情流傳向京師言罷歎息去春風
吹鬢絲

御莊舖

小縣他時號阜昌近城曾築讀書堂不須更唾劉郎面

豕欄牛欄是御莊

偽齊劉豫僭號更阜城為阜昌郡城北有讀書堂城南有御莊舖明程篁

墩詩有居人不睡劉郎面猶把亭名號御莊句

德州留別田雨來編修

帝里經年別書來少北郵故人多請假游子暫稽留風
雨燈前話江湖夢裏舟一筇雙不借行踏半塘秋

戲恼德平令楊建垣

草接平橋水拍津好風裙帶跨驢人清狂幾許冶情在
惆悵自嫌官裏身

四女祠

在恩縣西北四十里土人云漢景帝四年貝州人傳清字景山妻羅氏無子生

四女守志養親終身不嫁各植一槐以明已志四女通釋氏書日頌法華其後拔宅昇天云按

史周宇文氏始置貝州漢時未有此名自是傳聞之說考唐人王建詩注云宋氏五女貝州宋

處士之女也曰若華若昭若倫若憲若茵其父
老病誓不嫁以奉事之云按貝州乃今恩縣及
清平地疑
此即是矣

何處著鶯花春深孝女家門前古槐樹兩兩聽慈鴉

夾馬營

櫪馬驚嘶嘶不止紅光夜半熊熊起男兒墮地稱英雄
檢校還朝作天子陳橋草草被冕旒版籍不登十六州
却將玉斧畫大渡肯遣金戈踰白溝隔河便是遼家地
鄉社粉榆委邊鄙當時已少廓清功莫怪孱孫主和議
君不見蛇分鹿死關西京豐沛歸來燕代平至今芒碭
連雲氣不似蕭蕭夾馬營

月下聞吳歌

客愁今夜較偏多
歸路三千尚隔河
五十六回圓月底
南來初聽本鄉歌

衛河四絕句

王舟州有衛河入絕多叙行役之苦于風俗有所未備輒隨所見補

之

河流千百曲來往
候風信東南西北間
那得灣灣順

微雨曉來霽孤雲斷
不還黃沙千里道
何處著青山

佳人跨驢去隔岸
是娘家渡口風長好
吹開罩面紗

茅屋曾邊市蘆場
柳外橋誰知燕趙地
生計儘漁樵

將至臨清州

小雨吹午晴
菜花黃被阪
方愁白日暮
又惜芳春晚
河
流合汶衛
客路投東兗
樹杪見浮圖
去城應不遠

夜泊南板閘

來從漱玉響淙淙一枕神清靜聽中只似秀林亭下宿

隔窗今夜雨兼風

北河紀漱玉泉在州城內秀林亭在州城外

聞荊州兄聲山姪南宮捷音却寄一首

各有高堂奈老何此情真足慰蹉跎到家鵲喜連朝有
照客燈花昨夜多從此朋遊推二阮向來場屋說三羅
壯心自倚消難盡歸去羞爲伏櫪歌

汶河阻牖少司馬楊公從陸路先歸余與外舅
尚滯舟次詩以志別

昨歲春風記出京再來何意得同行孰經世路歸貪早
老念貧交別忍輕水落汶河停去舫花穠淮岸待行旌

竹萌怒長櫻珠綻鄉味先輸一月程

謝孔心一大叅餉酒

城南高會已多時曾和東風芍藥詩賞到鶯花春爛熳
醉題襟袖夜淋漓尚書沒後園空鎖

謂朱大司空

騎省歸來

鬢有絲多謝故人猶念舊一樽重對却成悲

入插

萬派東南傾水勢本趨下何年迴地脈一股西北瀉自
從燕建都饋餉吳楚藉千艘万艘尾重載接春夏黃河
故道移東向海門射如殼水犀弩潮汐俱退舍支流導
不得脈絡乃近借沂泗濟汶洗橫濤孰分汜九十七名

泉

會通河在濟寧州城南南抵徐州達清河入淮北經臨濟州合衛河入海沂泗洗汶入漕之泉九十有七

扼吭走一罇綿綿數百里寸寸阻成壩層層板堵束宛
宛巨縷架通透蟻穴穿點滴糟床醉一牖守一官役夫
供咄咤么膺成鬼怪有若腐鼠嚇毫釐日主進傲慢禮
無迓糧船排幫來客棹何從駕汴堤鄭國渠事徃役隨
罷豈惟滋禾黍兼可活桑柘不聞溝洫成止用通艫舩
奈何并梗塞行旅見來乍我生昧時向永與捷徑謝所
遇總紆途濡遲復奚訝

閘口觀曾魚者

牖河一綫才如溝戢戢魚聚針千頭其中巨者長二寸
領隊已足稱豪首爾生亦覺太局促漂漚散沫沈還浮
不知世有海江濶長養何異蒙拘囚縱教族類繁鯁魴

變化詎得同蛟虬居民活計乃在此勞不撒網逸不鉤
竹竿縹罾密作眼駕以一葉無篷舟朝來暮去尋丈內
細細粘取銀花稠庖厨却緣瑣碎棄曝向風日乾初收
微鯉苟適飼狸用性命肯爲纖毫留吾聞王政雖無澤
梁禁鯤鮪尚有洿池游人窮微物必盡取此事隱繫蒼
生憂一錢亦徵入市稅末世往往多窮搜

京城西南豐臺芍藥最盛余未嘗一寓目也今
年與唐實君有約同賞復匆匆出都長途春杪
省記前言時實君已捷南宮矣作詩以寄兼示
梁藥亭鄭禹梅王后張張寄亭呂山瀏徐虞門
孫愷似王令貽陸冠周湯西崖吳元朗陳仲夔

錢朗行皆同年進士也

四年騎馬客京華不問豐臺賣酒家已約同遊向春尾
獨憐回首又天涯驪場易醒繁華夢貧女羞簪富貴花
但是成名寧論晚少年能得幾人誇

阻牘十日始得渡臨清關

明知前路方多牘且喜今朝已渡關
薺菜花開春事了
荒城十日鬢催斑

晚抵梁家鄉牘

十里五里程三板兩板水遠寺有鐘聲
隴隴烟樹裏隨風渡渚去已斷還復起
獨客此時聽孤燈壓篷底

東昌道中

黃沙碧草兩無情，鷓鴣愁聞第一聲。辜負瓊山詩句好，

杏花開後過聊城。

杏花尊酒記聊城元裕之詩語

聊城舟中再得荊州兄臚唱之信喜疊前韻

才藻稱量去幾何，有誰高占五經科。一名縱使輸人後，
頭地終看讓爾多。逸足逢時爭築館，高鴻回首笑張羅。
青山憔悴無如僕，破涕猶能擊楫歌。

登光嶽樓

聊攝城端万木風，層樓高勢拓齊東。晴光過雨浮浮白，
初日迎帆靄靄紅。汶水曲流荒甸北，泰山遙指亂雲中。
綠蕪滿眼春垂盡，獨倚危欄看斷虹。

曉晴即目二首

水潤沙田鑄棊犁
粼粼兩岸麥頭齊
柳綿已被風吹盡
不化浮萍但作泥

灘平風軟出前津
畫舫南幫自作隣
一練波光如拭鏡
翠烟扶起柁樓人

晚泊周店雷雨大作

已作迴風半日涼
忽聞雷雨洒淋浪
洪流赴牖增雷勢
一綫穿雲走電光
斑籜定抽苔徑筍
綠針初剪水田秧
喚醒孤客田園夢
剩有蛙聲似故鄉

入兗州境望徂徠山

青山雅淡如故人
何可經時不相見
我行久與故人別
轉向青山增眷戀
來從燕趙歷齊邦
千里平沙黃一片

眼前俗物厭勃塞物外心期失葱蒨朝來雙眼豁然開
已報汶流通魯甸日高螺髻矗諸峰天遠修眉浮半面
含姿獻態各自媚一老莪莪聳冠弁茲山洵屬魯之望
指點兒童悉能辨猶傳有道石先生六一垂銘抵佳傳
聖人已遠道僅存此事終應賴狂狷景行併作高山仰
恍惚風流覲前彥白楊風急不少留片帆忽過東阿縣

南旺分水龍王廟

兩龍爭掉尾萬馬各隨群勢自中流劈聲猶隔岸聞江
河雖日下南北竟平分先寄歸心去吾家傍海濱

孫村

村繞河流一曲路分湖面三
義青蜓雨催麥秀黃雀風

開棗花蘆邊橋影人影林外漁家酒家漸近南中土俗
居人多食蝦蟇

過濟寧不及遊南池

人笑平生頗好竒勝遊到處每差池

曩在武昌不登黃鶴樓過長沙不游

岳麓書院故云

不才自信能藏拙况有光芒李杜詩

魚臺道中

一碧開平遠居人就土泉斷山連石麓涸水益湖田風
俗佃漁地菰蔣雁鶩天自慙生理拙飄泊過年年

沛縣泗亭驛二首

萬乘還鄉父老迎大風歌罷氣崢嶸不知何事翻垂淚
方覺英雄別有情

一劔親提帝業成
枌榆猶動布衣情
沐猴豈是真龍匹
富貴徒誇畫錦行

出牖

烟波六十宿淹泊
情不洽前途得通津
客况喜出牖平流
一川穩叢葦兩岸夾
好風綠陰來黃鳥啼
恰恰南船各相飭
北客焉得狎蠻歌
楚儂和香稻吳娘
畱明知漸近家畏
路接眉睫近聞黃
河流怒氣中尚挾
治河如築舍國計
司農乏盡輸竹楨
沈更費柳帚壓坐
視淮泗民爲魚鰲
鵝鴨餘生猶應役
婦女助畚鍤廟堂
宵旰憂疏瀹豈無
法九年始殛鯀厥
罪浮令甲書生托
空談快意取一霎
作詩攄憤懣強韻
苦難押

宿遷

纔過桃花漲沙痕嚼岸新孤城依井底三面轉河身
鼃居相雜蛟龍性不馴長聞淮泗滿嗟爾一方民

雨中渡黃河六韻

直放東南去無風自作聲中流帆影沒遠樹浪頭生
雲與平蕪際灣隨曲勢成竟同浮世濁待得幾時清
官柳行行密閒鷗對對輕空濛三十里轉眼失孤城

桃源縣

廢綠春荒瘠土耕河壩小縣併無城武林雞犬應相咲
如此蒼涼浪得名

清江浦

淮山浮遠翠淮水漾深綠倒影入樓臺滿欄花撲撲誰
知闌闌外依舊有蘆屋時見淡粧人青裙曳長幅

漂母祠

慙愧恩叨一飯深當時果否識淮陰後來不却千金賜
難說初無望報心

淮上曉發

紈如五鼓催船發輪仄高城下弦月已聞兩岸過鈴聲
燭燭曉星光未沒依稀枕上續歸夢尚隔江湖浩難越
起來照影向清淮愁見塵顏映華髮往還跨下橋邊路
萬事回頭總飄忽只有年光不負人鯿魚絮煖蓴絲滑

遊喬石林侍讀縱棹園出圖索題

海棠花紅紫藤紫日日酣歌向燕市別中兩度負春風
短棹來尋白蘋汜奕棋時局經眼見去國名高今有幾
先生一賦歸來辭多少陰功被桑梓朝廷已用當時議
海內方思正人起那知一意方掉頭風月無邊任驅使
別開小堦植籬援汀溼三鷗板橋水水窮橋斷去無路
賴有輕船纜沙尾迤邐初疑村落傍灣濃忽轉高城趾
蔣芽荻筍芰荷葉淨綠澄鮮雨新洗釣絲影裏亭榭開
萬瓦鱗鱗動波底琴床旋傍曲檻設門徑從教比隣徙
梅邊補種竹數竿柳畔移栽花万蕊莫言此樂乃易得
拋却金龜纔換此假公尚直蛾眉班夜枕終當夢田里
斜街草堂縱峻絕未免浮塵洒窗几空看圖畫憶故鄉

何似收身圖畫裏只今杖履歷真境愛護猶珍一幘紙
經過不拒野人遊敢惜留詩嘲鄙俚水南地空多莎草
鷗鷺成群占涯涘許我閒撐放鴨船與公唱和從茲始

余亦以放鴨
圖索公題句

秦郵道中

高田半沒低田淤小舟賣藕兼賣魚可憐活計墮水底
盡是失業耕田夫湖波怒鬪孤城口一派荏苒萃淵藪
但望南風長黍苗不須東岸栽楊柳

紅橋即事

對門楊柳慣藏鴉斑竹籬前姊妹花十里珠簾消不得
扇紈風起客思家

敬業堂詩集卷九

敬業堂詩集卷十

海寧 查慎行 悔餘

獨吟集

起巳巳正
月盡九月

去夏到家外舅陸先生風孿漸減猶冀稍延歲月也乃今二月竟爾不起余旣視含殮復徇故人之招匆匆北上關山獨往觸緒悲來不禁涕泪之橫集也

外舅陸射山先生挽歌二章

公亡先友盡孤露感吾生別有無窮泪非關兒女情破家緣結客玩世亦逃名不比陶元亮徒高處士聲

吳天春夜月偏犯少微星昨去扶衰病今來失典刑履

綦雖寂莫畫像儼精靈世乏中郎筆誰爲有道銘

重過聽鶯齋留別徐淮江二首

一度相過一愴神尚書宅畔老松筠年時地主無多在

狼籍江關况酒人

傷程禹聲家鞞荒也

雁行啼過雨瀟瀟往事深燈又此宵記得小船秋港別

葦花遮斷賀家橋

虎丘

又作山塘一日留相逢往往說宸遊朱欄路轉千人

石黃瓦春開萬歲樓花柳時清無隙地管絃與盡有迴

舟繁華何與閒僧事添炷香燈照白頭

吳門與惠研谿話舊

燕市歌狂散酒星勞勞三百五長亭桃花影裏抽帆路
流落江東剩兩萍

京口遇朱悔人

丁卯橋荒感再經勞人雙鬢各星星一帆北固烟初暝
二月南徐草未青京洛夢回同斷梗江湖天濶但浮萍
春愁滿眼分襟路怕上旗邊舊酒亭

三月二日揚州作

鈔關門外綵層層三月烟花見未曾張得水嬉還望幸

船船絃索上紅燈

時傳
已幸淮陽
大駕

上巳過平山堂下

發軔維陽城茗茗入塵陌不逢前裙女但見騎驢客平

山平似岸夾路植松柏堂空感良遊事往念前哲當時
手種柳搖落那禁折斲此駐征鞍一帘風向夕

晚宿大儀鎮

萬乘方南巡孔道車奏輻我行取紆折路僻馬不熟臨
岐徘徊鳴旅况愴孤獨廣陵繁麗地咫尺異風俗沙田
廢牛耕灌莽抽新綠人稀鳥巢少鴉鵲爭一木村童弛
樵擔古佛棲草屋杳杳望炊烟荒荒晚投宿

天長縣北郭外垂柳夾隄清渠一道土人云即
汴河也

萬葉千梢映碧波一條虹影曳坡陀天長縣北聞人說
此是隋家古汴河

自盱眙北界沿洪澤湖西北行晚至高家堰

淮泗方合流洪湖際溟漠水所從來高其勢建瓴若長
堤亘首尾力敵萬鎖鑰近傳泗州城三板沒郭郭澄波
見井竈了了魚蝦躍淮陽地尤卑東岸狂瀾劇十年費
國計万杵鳴橐橐排椿內甃石陡起堵墻削禹功紀告
成注海有疏濬不聞當橫流扼吭恣噴薄決口既須塞
減水孰開鑿自唐埭以上決口三十四減水壩六減水
法始於宋回河之議蘇頌濱云回河雖罷
減水猶存是也九道湮成河洪澤以下向沙田梗流惡放之使
行地汗漫無歸着天下本一家揚州忍爲壑移亡及身
事丘墓傷淹泊可憐水鄉民不及鼃黽樂 九重亟軫
念南幸求民莫河嶽盡懷柔淮神敢行虐天功即帝力

愚賤矧可度我來愛漣漪正值沙水涸一程滌煩懣清
曠迥踰昨夕陽射湖東欲落尚未落忽然得新句放眼
向寥廓

黃河待渡

遠行疲長途春晝赴急景柅車柳陰下稍覺白日永黃
埃渡河來風氣變淒冷奔湍怒流濁拍岸高過頂千檣
万檣形倒視無一影沙崩人跡散月上波響靜衆涉叩
敢爭及茲放孤艇

澗橋

風色轉河壩春光滿淮甸阪被菜花黃籬窺野桃舊朝
陽出疎樹蘆屋烟中見饌無登盤魚戶有啣泥燕從人

問前路已近清河縣

大霧新灘道中

陰霾忽交集一氣吞平沙如入大海中
瀰漫四無涯前行泛孤鶩後旅延修蛇
似密忽已疎稍開旋復遮大塊任勃塞
陽烏斂光華朦朧一鏡懸注視眼不花
方當晡靄際正氣難勝邪無何廣漠風披
豁青天霞君子視洞達毋令道里差

次日發沭陽渡小溝河大霧復作次前韻

昨日如細雨今晨同歎沙廣川橫我前
截岸作兩涯晝如壯士劔當道分長蛇
亂流苦無舩林黑影被遮僕夫牽馬渡
闇闇迷春華路旁玉瓏鬆結作野草花
老農識

占候何筮歌汗邪連霧知大風暮雨看晴霞人事難預
測物理永不差

紅花埠至曹村四十里間桃李夾路

遙林春鳥啼客枕促晨起有村有園圃無處無桃李烟
氣薄花光迷濛四十里方當鞍馬倦忽值風日美欲去
轉躊躇北行恐無此

大風

新月夜生暈朝來果作風初聞響騷騷停午聲蓬蓬砂
礫本附地簸蕩忽向空遙天失其青皎日爲之紅憶昨
衝霧雨兀如醉夢中行當快掃除何復遮溟濛勃蹊向
六鑿無地置我躬有目欲使昧有耳欲使聾口鼻比山

澤呼吸恐不通五官心則靈獨覺非外蒙涉川畏波浪
遵陸愁霾零男兒歎失意豈必皆途窮平生塵土緣鹵
莽焉知終去去洗垢濁還君憔悴容

寒食行

老鴉銜紙錢飛上白楊樹破廬誰氏子挈榼上冢去新
鬼土作堆堆平鬼亦故百年過鼎鼎孰者非朝露安知
今樓臺不是昔墟墓十年寒食節九度他鄉路看到野
棠梨荒山春又暮

清明日蒙陰道上觀鞦韆戲作

隔牆聞笑聲人在花枝下花枝旋搖動傷有秋千架何
人挾飛仙天半飄裙袂瀏漓俄頓挫按抑還騰躅力怯

不自持身輕若無藉柳絲妬腰細捲起向空掛却下整
雲鬢神情自閒暇魯邦喜遊治民俗廢桑柘已經上巳
辰纔過百六夜新粧與靚服徃徃出茆舍鄉風隨俗有
客路關心乍未免憶江南家家好亭榭

新泰旅壁見故人周青士題詩愴然繼和

歎息溪南老生涯詎忍論有詩題壞壁無計臥窮村去
作京華客歸招旅櫬魂乾坤吾哭汝塵土上啼痕

過西嶺數里許土岡微起道傍新立木榜署古

新甫山五年前經此未嘗有也

南眺東蒙峰北瞻泰岱巔相望三百里徂徠處其間新
甫特土壤居然亦名山石老栢不生荒榛互綿延文人

好夸大後世事或然曼碩告寢成煌煌郊廟篇移風繼
周頌孔子經手刪不應闕宮什失實載簡編魯邦岩岫
多高峙爭孱顏今聞非昔拍彼此揣度懸年往事易訛
况加附會牽我欲正此謬詩成恐難傳王伯厚困學紀
聞云魯頌徂來
之松後漢注兗州博城縣有徂來山新甫之相傳注不
言所在惟後魏地形志魯郡汶陽縣有新甫山通典漢
汶陽故城在兗
州泗水縣東南

望岱

山形陡然來其勢乃易量孤根雖秀拔群岫或爭抗泰
岱四岳宗宇宙虞隘妨去聲大麓起沂州鱗鱗疊巒嶂客
程窮五日日日坡陀上不知去平地已是幾千丈漸覺
所歷高縱眼快前嚮昨經新泰郊突兀方示象將開意

忽會在遠神彌王霞氣舉之升隔天樹屏障龜蒙挾鳧
繹連絡走相徬徂徠亦兒孫未可儕輩行其他况培塿
倚伏同一狀今朝及山趾耳目嗒焉喪便思躡芒屨去
倚扶桑杖天門沈寥開万里誅蕩蕩仰瞻星漢逼下掃
雲海漲雞鳴日觀峰倒影出摩盪惜哉身未到祇用窮
想像秦松漢代栢盤攫倘無恙碑憶磨崖鑄亭思駐蹕
創賢君七十二踵事規撫壯如何太史文隱躍時近謗
誰陳封禪頌體格要有當游蹤觸覩記即事語敢放覽
眺存古懷終期慰遐暢

瘦俗戲和次谷兄

晨辭泰安州午達長清境石欹行礙步土燥俗少井木

瓢酌山窪歲久必生癭醜形婦女甚戶戶裁濶領

東坡詩濶

領先裁覆癭衣

牛病垂老胡豕肥縮短頸苦開脹河豚餘怒鼓

蛙黽兒郎打銀釵亂髮時一整野花插偏髻陋質寧自
省

開山廟

磽确苦厭山出山愛蒼翠迴看青蓮花一一吐烟際綿
連魯齊界豁達燕趙氣黃塵有時開白日曬平地輪蹄
倚空濶所向莽無避蹭蹬身已經吾行方按轡

曉過平原

宿醉兼殘夢朦朧過幾村明星天一角紅日縣東門四
面柳陰合千家烟氣昏朝來好風色躍馬過平原

重宿德州有懷研谿西屋

德州城邊三月杪桃李家家傷清沼繫舩人見跨鞍人

一色春衫青鬪草令君載酒遠見餉

去年春杪泊舟德平楊令君攜酒相

過侍史求詩近相惱風流學士田先生

雨來編修騎馬來尋

苦不早城端角聲門欲閉話別匆匆語難了杯闌却記

惠與湯此地曾誇紅袖好詞題裙帶付張態曲記油車

嫁蘇小每攜行卷跨向人不信裝囊易傾倒爾來好事

復誰繼只有征埃催我老春風兩鬢添幾絲又是去歲

看花時

河間道中

沙路條條似前行曉易迷牛鳴新店火月上阜城雞古

埃烽煙靜遙天樹木低數錢工姹女詩橐关空攜

與彭椒崑

時宰河間縣

別裏三年夢初疑作吏難衝繁畿輔地辛苦牧民官元
結詩仍好安仁鬢未殘合并無限喜爲爾一加餐

椒崑座上喜晤王赤城兼讀集中見寄詩知與
余神交有年矣短章奉酬

故人知我來埃騎迎郊甸相逢車笠間尚作文酒讌後
堂出嘉賓齒序列筵簞爲言老兄弟結契自少賤我初
熟君名想像得君面邂逅此會竒心期慰依戀酒酣出
新句唱和近成卷語妙非俗觀篇終有餘善長歌謬見
及卒讀評深眷僕本田間人無端去鄉縣奔馳十年事

迅若釋絃箭挾瑟與彈箏隨時技羞變重來有何趣翼
塌孤飛燕猥蒙許與加力薄已難踐從君生感激別淚
爲一泣

趙北口

燕南趙北際地是古易州兩淀亘一隄

隄南爲白洋淀
北爲黑洋淀

隄長若橋浮前年驅車過寧淖沒我輪雨脚颯颯垂心
懷失足憂至今旅枕夢澁縮不敢投茲來喜春霽日色
和且柔晨餐具鮮鯽門有曬網舟飛沙隔岸來風削墮
浪頭俯見夾岸柳枝枝倒清流人生各有營偶過難久
留愧此千頃綠一雙雪毛鷗

自雄縣至白溝河感遼宋舊事慨然作

已割燕雲十六州雄關形勢咲空留
兩河地與中原陷
三鎮兵誰一戰收
細草鳴馳非故壘
夕陽飲馬又中流
長江南北天難限
一綫何煩指白溝

過涿州懷楊耑木

廟社樓桑跡僅留
城南緩轡記同遊
春風又送孤嗟客
一背斜陽過涿州

三月晦日飲朱十表兄槐樹斜街新寓同梁藥
亭吳震一作三首

槐街舊與一峯隣

一峯喬石林侍
讀舊寓堂名

酒甕重開為洗塵
最

喜今年春帶閨遲來猶作看花人

兩株桃樹手親移
紅影紛紛落酒卮
特與幽庭添曲折

秫稻稷綫縛笆籬

古藤陰下三間屋爛醉狂吟又一時惆悵故人重會飲

小箋傳看洛中詩

是日得家德尹洛中所寄絕句

豐臺看芍藥回家次谷兄陳元之甥四首

不用穿花坐竹兜蹇驢馱客穩如舟垂楊十里綠陰合

中有一雙黃粟留

意外穠粧鬪眼新無端一咲爲迷津妬他誤馬隨車處

出色花枝不避人

紅艷群羣綺陌遊春風繭粟憶揚州十年一夢依稀似

老眼貪看分外羞

孟公愛客不尋常知我錢空買醉囊特遣白衣迎半路

一壺重發少年狂

時陳實齋遠
致酒肴見餉

次韻送梁藥亭庶常請假歸南海

但使官情澹何妨老耐貧
忍拋同醉伴還對獨吟人
草色留書帶槐陰借比隣
荔枝紅過嶺一騎是歸塵

夜聞孫愷似家絃索聲戲柬索和

歌頭酒尾惜惜夜懊惱
燈光却被遮畧似香風吹夢醒
一番芳事屬隣家

合肥大司馬李公席上聽楊老彈琴

臥遊堂北夜惜惜及記年時刻
燭吟別後人誰憐廢瑟
爨餘公自賞孤琴衆山圖畫聲
相應一技工夫老更深
慙愧重來聽雅奏也應情感爲知音

朱恒齋招余下榻齋中書此示意

君家春草堂舊是雙書地手澤尚如新忍添遊子淚

移寓次譚護城給諫韵二首

貪得槐街近作隣

舊寓去竹坑最近

再遷吾意亦逡巡無端併

誤將雛燕一月遽廬認主人

雁齒檐齊落井湄清泉飛出起淪漪
轆轤本爲澆花設一折流成洗硯池

病夫嫺惰朝貪睡最怕車輪撼竹床
此地市聲來較遠輕雷隱隱過隣墻

移寓後喜魏禹平早過

莞桔庭幽愛客來籬邊一徑恰新開
曾經昨日爭棋處

拾得花陰墮子回

題蔡方麓修撰早朝圖二首

水精簾捲月如鈎，侍史粧成盡下樓。
比似早朝還較早，不教君起看梳頭。

花冠催曉漏聲微，樺燭光中翠袖圍。
未拂御爐香已透，玉纖親捧上朝衣。

暑中坐敬如西齋竟日

蕉心展卷放高葉，藤蔓著花垂嫩梢。
笛簟一床書萬卷，紙窗南北綠陰交。

西厓久患耳病詩以訊之

藥鑿烟氣散清晨，薄病風流又過春。
街鼓不傳眠較穩。

砌花貪看眼長新對床尚憶聞雞伴一震翻憐失箸人
好與繙書報方法滿壺社酒乞比隣

喜雨對榻有懷西厓聯句二十六韵

觸熱來京師驕陽值乾暵平禹僑居隔隘巷欲出愁喘汗

夏重濡髮頭濯冰燎毛背炙炭平禹爍爍火帝輪赫赫炎官

夏重織鳥焚顛木巢蠅嘬削瓜案平禹居人苦燁灼行者防

糜爛夏重側聆清禁中一月做宵旰平禹魯史陳舞雩周詩

誦雲漢夏重不傳避暑銘每厖當食嘆平禹吏無酷可烹禮

有典乃按夏重桐魚瘞壇圻金雞釋狴犴平禹天心倏已移

雲氣滂不散夏重電雷震虩虩溝水鳴灌灌平禹急來扣扉

聲拉雜屋壁捍夏重捲書君劇喜踏屐我奚懼平禹榴葢紅

洗粧梧蔭翠流翰夏重潤拚沾幔濕密愛拓窗看平禹拟饒

魚登拌戶小杯舉觚夏重鬱襟快哉披短憤頽然岸平禹雖

當醉眼纈未許鼻息夏重憶昔斜街西吾友客僧館平禹

聯吟秋歷九聽雨夜過半夏重往事忽到心暗嗟流景換

平禹虛名三子曾失意二人但夏重預憂燭見跋冀聽響達

日平禹凌晨過東隣老樹恣所玩夏重

古銅筆洗聯句狀如荷葉中有銀魚長半寸許三足皆作螺形

土花蝕已徧平禹雅製近宣和夏重片葉翠遮硯平禹一珠圓

滴荷夏重露鱗沈白小平禹烟殼帶青螺夏重欲遣詩塵滌平禹

濡毫墨幾多夏重

集槐樹斜街苦熱聯句此首已刻曝書亭集今附見

苦熱今年甚幽州亦蘊蒸朱茂久無甘雨降惟見火雲

升姜宸英際夜焦烟合經天杲日恒徐善高林枯白帶淺泚

露丹稜王原最怕衝灰洞何須堰戾陵黃虞稷河流金口臆

山翠畫眉層朱彝尊黑蛭潛難見商羊舞莫憑萬斯同新畬

荒黍稷遺種慮蝨蝻張遠零隊分行綴祠官典故徵譚瑄力

難驅旱魃咒乃試番僧慎行童女雙小髻旂竿五色繒李澄

中 新粧朱箔捲雜戲綠衣能魏坤虹霓群情望塵埃萬目

瞪龔翔麟疾雷無影響長轂但輪較釋淨憲銷夏愁無策聯

吟喜得朋湯右曾盡諳微徑入不待小僮磨朱儼席帽人人

脫亭欄處處恁鄭朝袞劇談多野趣苛禮必深懲錢光夔旅

跡頻年共鄉心觸緒增茂小航思劃漿精舍憶擔簦宸英

白剝烏頭芡青牽紫角凌原夕風嘶麥蠶橫港沒魚鷹

竹樹濃於畫篔籹密似罾尊干家花滿屋六月稻交塍

曾自失江村樂翻憐毒暑仍同斯黃沙隨扇集白汗比漿

凝遠易漬牀牀篔空支院院棚擔稀珠市果價倍玉河

冰慎檣落含香莖攀拳裊格藤善暗窺蛛網縮乾拆燕

泥崩麟戶撒垂簾額瓶添汲井繩儼慵尋溫水浴只想

冷硯登瑠三葛衣猶重雙絲履不勝撥書嫌走蠹懸拂

倦驅蠅坤祇覺掌拖便誰甘襪襪稱覲到門防客刺無

地曲吾肱尊亟買泉澆圃同貪草藉芳凋酒拚河朔飲

茶愛武夷秤英返照斜初斂微涼暮可乘原分曹爭射

覆四座百觚騰慎

醞舫消夏分賦涼篷

平鋪一面蓆高出四邊牆雨似停舫聽風宜露頂涼片
陰停卓午返景入斜陽轉憶臨溪宅松毛透屋香

次韻奉送大司空翁公請假歸虞山二首

特賜冬卿上冢還履聲暫許撤朝班官情自領升沈外
物望同歸進退間圖畫重開供帳路雲山新署草堂顏
依稀文靖城南墅只隔蒼烟水一灣

布衣重上退賓堂多愧南豐一瓣香場屋感公憐被放
橋門回首憶分行如蓬旅跡仍難定似海恩門豈易量
不覺臨岐成雪涕車輪那得比迴腸

公爲國子祭酒
余受知最深

初秋同胡修予王令貽王文子林碧山程天石

家荊州小飲雙林寺荷亭上次韻

共喜聯鞍去精藍古堠邊
斷橋花底鷺高岸柳陰蟬
野意迎涼爽秋容得雨鮮
昔遊吾自記塵土夢三年

丁卯春與

時菴先生小憇於此

題許壺山小影

共識丹徒一布衣
曾將健筆動宸扉
如今却伴梳翎鶴
縱有烟霄已倦飛

牽牛花十二韻同竹垞兄賦

添得新秋意幽芳豔一庭開
長先七夕名許拆雙星
宿露涼初洗朝陽夢乍醒
籬頭從點綴竹尾借娉婷
徑淺疑妨帽窗疎愛拂櫺
蜘蛛簷角網蟋蟀草邊亭
垂處梢

梢碧分來朶朶青有人纂綠鬢無分插花餅輕較春天
蝶微黏雨夜螢尙形嫌鼓子妬鳥啄金鈴榮落誰相惜
涼暄爾慣經寫生煩妙手渲染上圍屏

贈如臯許嘿公

許工篆刻

曾摹一卷岐陽碣只作西周舊本看好古未妨生末世

成名終不藉微官

許曾宦闕中

眼中識字如君少老去知音

較昔難料合中原無手敵莫教旗鼓更登壇

嘿公向受知於合肥

龔尚書其贈詩有寄語揚州
穆情中原旗鼓正相當之句

雨中同竹垞兄過恒齋飲次竹垞韻

儻居長喜接京坊但約相過便對床數點忽飄花外雨
十分初透竹間涼詩貪老境甘如蔗醉覺香醪味似糖

還有持螯餘興在隔厨燈火聽鳴薑

西郊雜咏與竹垞水村分賦五首

三虎橋

狠石怒趁人風聲挾秋雨馬驚左右顧橋滑路難取誰
呼北平守三發三飲羽我欲從之游入山射真虎

昌運宮

老鶴巢古枝虛廊交冷翠淒涼前代塚傳是張常侍煌
煌元老文苔蝕仆碑字賜域滿西山斯人或無愧

松林院

珍果充尚方嚴鐫守花木今年上供缺夏旱秋不熟僧
庖拾枯枿客飯烹野藪莫怪鳥來稀疎林葉俱禿

摩訶菴

修竹如高人閒花比靜女移根入廟市束縛吾憐汝人
生屬有役物性便得所及此憇茆菴秋光媚孤旅

元福宮

出屋聞遠籟入門走長松粘天百頃濤下有掉尾龍長
養紀何朝云自明武宗迴鞭促斜照紫翠凝西峯

次韻送卓履齋

等輩風流滿座傾不因入洛占時名半年旅跡萍漂斷
八月邊塵雨洗清家遠窮交愁易別路難歸計羨先成
長橋兩岸蘆花雪畫裏扁舟一纜橫

次韻送周林於歸梅里二首

結客曾經汗漫遊，雁風吹落鬢絲秋。
誰憐豪氣除難盡，脫却征衫去叱牛。

燕昭臺側酒壚傍，別後親知半在亡。
傷青士分虎也重向溪南揮老淚，十年孤客始還鄉。

次韻送高念祖遊晉中

一天霜氣上征袍，獨雁離襟愛羽毛。
惆悵黃花燕市酒，送君時節近登高。

送君時節近登高

天寧寺觀塔燈聯句

同後一首亦刻曝書亭集

秋風鳴枯槐，斜日薄西崦。
徐善並馬入寺門，客衣罽毼

朱茂于焉展嘉覲，一咲輟鉛槧。
高佑巡檐禮紺塔，卓立

大且儼。
朱彞陳丹和暗粉，古色剝渲染。
魏蹟仍開皇舊

函并舍利崦

慎行

一十三重檐檐風鐸颯

善

蟠楹蛟躩

踞負礎鬼瘠貶

茂

飛梯絕階級白石奪琬琰

鈿

鎔金范

為燈設砌架成

廣

纍纍仄蜂房歷歷覆蟹罍

坤

怖鴿

棲難安一夫敢走險

慎行

綆缶挽膏油豆火發星燄

善

初

如螢尾炫忽若獸目睽

茂

或如爐杵炭或如竈炊栝

鈿

須臾繞扶欄散作四百點

尊

虛堂鑿纖毫老樹失掩冉

坤 置身圓鏡中交光不可掩

慎行

氛烟看直上樓閣時一

閃

善

鼓鐘聲遠聞來者紛襍

茂

提攜及童嬰羅拜雜

寺闍

鈿

營營各有挾邀福得毋諂

尊

禮義苟不愆寸心

又何憊

坤

玩物隨所遭誰能束崖檢

慎行

宵分梵放歇漏

轉人散漸

善

茗椀坐屢遷松關啟還扃

茂

衰年疲倚徙

禪榻擁衾篔

銘

弦月墮側輪濕雲俄淅淅

尊

驟驚山雨

來昏夢豁嚙魘

坤

晨興矚林端餘燭尚未斂

慎

九日雨阻天寧寺聯句

仁王塔祇樹林客九日期登臨

朱彞尊

木蕭蕭雨濛濛泥

滑滑愁人心

慎

行馬毛縮魚潦深行躑躅坐沈吟

魏

日月

逝年光侵去者昔來者今

徐善

別苦易思難任樽有酒且

酌斟

高佑

脫我帽披我襟折黃花試共簪

朱茂

咽

送次谷兄南歸次汪東川祭酒韻

甞來那得久淹留八十高堂已白頭布被一床空戀別

人門半刺肯輕投黃沙草接新霜路紅葉燈移古渡舟

箕得過淮天氣好初冬風日尚如秋

送江補齋侍御巡鹺長蘆次禹平韻

析津脈絡聯神京
白河南注駛且清
天開地坼三百里
樓櫓突起高崢嶸
晴烟晝騰氣靄靄
刻漏夜下聲丁丁
雄關屹立當海口
鯨喙鰲擲誰敢撓
雲帆暫轉吳會粟
鎖鑰西北收專城
洪波浩漾百萬頃
坐令魚鮪無滄驚
設官豈徒重筦笏
畿輔要借桓驄行
我聞利藪俗爭鶩
豪猾勢得揜重輕
大賢當道積弊去
不貴鷲猛惟廉平
燕雲趙魏達齊魯
管內九月催王程
蘆花雪輕點別酒
柿葉霜染飄前旌
此時送君乘傳出
四境藹若春風生
鹽梅往往調鼎鼐
竚待妙手歸和羹
野人留眼望天際
法曜正傍台垣明

王孟穀重至都門

我亦騎驢客粗知行路難六年三見汝辛苦渡桑乾

敬業堂詩集卷十

敬業堂詩集卷十一

海寧 查慎行 悔餘

竿木集

起巳巳十月
盡庚午二月

飲酒得罪古亦有之好事生風旁加拍斥其擊而去之者意雖不在蘇子美而子美亦不免焉禪家有云竿木隨身逢場作戲聊用自解云爾非以解客嘲也

送趙秋谷宮坊罷官歸益都四首

時秋谷與余
同被吏議

竿木逢場一咲成酒徒作計太憨生荆高市上重相見
搯手休呼舊姓名

劉魯封章指摘生滄浪大可濯塵纓宵言預會皆名士

誰似君家老叔平

君別蓬山作謫星我從霧谷擬潛形風波人海知多少
聚散何關兩葉萍

南北分飛悵各天輸他先我著歸鞭欲逃世網無多語

莫遣詩名萬口傳

秋谷贈余詩有與君南北馬
牛風一咲同逃世網中之句

初冬拜朱大司空墓感賦

城南舊是陪遊地一片蒼涼野哭中宿草墓門黃葉雨
亂鴉祠宇白楊風餘生削跡誰知已往事傷心我負公
肯信九原還有路人間何處不途窮

竹垞招遊白雲觀同錢鷗舫王令貽魏水村嚴
寶仍吳震一分韻二首

沙晴冬候暖古觀晚蒼涼一徑踏殘葉半庭餘夕陽泥

封丹竈合石護醮壇方華表依稀似蓬萊是故鄉

得方字

燕丘吾舊到逐伴記新春羽帳千年蛻虛堂四壁塵名

山遊已晚遺跡訪初真欲補儒仙傳欣逢好事人

得春字

重宿傳經書屋與愷功話舊次唐實君留別四

首韻

再來欣接席昨去惜分襟兩度平安字三年聚散心夢

中追舊事愁裏廢孤吟豈意麻茶眼重窺翰墨林

絕域身曾到名駒小最能膽教更事壯詩喜逐年增畏

客門長閉看山閣偶登故知關性分愛近讀書燈

欸欸留吾住依依見汝情硯冰融墨淡爐火撥灰明淺

夜談難足流年感易成雞頭池上月白髮照初生
易作匆匆別華堂費夢思暗鐘隨杵斷殘燭得花遲穎
待囊錐脫斑從管豹窺出藍真屬望慙媿我稱師

恒齋邀嘗桑落酒同竹垞賦二首

哆口長餅壓手杯隔簾鏘噐爲親開不愁更欠尋常債
每過朱家醉始回

石湖詩句也風流橘露松舫品最優五斗蒲桃真濁味
肯將石室換涼州

同竹垞水村步入一莖菴登妙光閣

偶然聯袂袂隨意叩禪關門徑忽新改居僧出未還一
尖城上塔幾點樹頭山此處宜看雪危梯約再攀

善果寺

高林鳴枯風院淨如澌水時有杖藜僧下堦拾槐子

歸義寺

中有遼初石幢

地作隣人業苔侵破廟堦兩三碑背字猶記會同年

冬菊聯句二十韻

猶剩籬邊朶幽香伴小齋魏坤祇緣開較晚真與俗難諧

慎行憶植當松逕分苗傷秫稽坤一行頭並摘幾稜手親

排慎行未治蠹兼暈先防虎似豺坤栽培從老圃束縛向

斜街慎行擔喜連泥買僮嗔膏雨差坤素心邀我賞倦眼

為君揩慎行白酒重陽過清吟十月偕坤瘦窗圍竹几涼

路別慎行梭鞵慎行獵獵風捎幔紛紛月浸堦坤稍應愁雪妬

幸不被塵埋慎行采可芻新釀簪宜綴冷釵坤葉經霜後

歛花比節前佳慎行小塔燈雙影低屏水一涯坤落隨騷

客賦淡入雅人懷慎行寒色方凝榦新芽已發荻坤過時

拋瓦缶留種記牙牌慎行按譜名空羨餐英願尚垂坤明

年須放早吾欲返荆柴慎行

呂灌園屬題小影二首

不知何處響深峭削藤蘿側面峯喚起清風荅清嘯

濤聲飛上最高松

曾向山陰作寓公一筇歸借白頭翁跣趺消得幾多地

何必千岩万壑中

冬夜朱介垣給諫宅觀倒刺和竹垞兄絕句四

首

樺燭枝枝細吐烟曲屏影裏夜如年索郎美酒耆婆舞

醉倒蘇家藥玉船

時介垣新得此杯

雙燕身輕拂地迴歌頭舞遍一回回問渠從小誰傳得
似按西涼坐部來

鐵撥檀槽急作聲六么鞞上一牀箏忽驚雷雨簾前起
殘雪開窗月正晴

薄薄粧梳楚楚伶酒邊孤客對飄零紅筵大有開元曲
別樣傷心已怕聽

大司馬合肥李公見示遊盤山十律兼屬繼和

敬題二章於後

泉石曾關十載心勝遊往往礙朝簪也知去郭無多遠
所喜探幽不在深紫蓋自開蒼蘚路紅紗長護碧山吟
滿空何限松篁韻盡入鸞歌鳳舞音

不教騶唱駭山僧竹杖籃輿取次登老樹傲霜還帶葉
細泉迎暖未成冰盤來磴道雲千疊遠處峯巒雪幾層
已失從遊吾自悔得披高咏興偏增

陸端轂索贈

五色邵平瓜一口韓康價古來高世士亦在長安下軟
塵堆裏記相逢歸夢時時寄短篷筆床茶竈何年具準
擬尋君笠澤東

讀張趾肇徐安序冬日感懷唱和詩次原韻二

首

窗隙飛塵日易斜，忽披新句感尤加。
路難不爲登樓賦，才盡非關入夢花。
倚竹何心矜翠袖，聽歌有淚滴紅牙。
斷蓬生事無聊極，不獨君悲我亦嗟。

小榻吟成膝自搖，一燈照影共淪飄。
雪侵短鬢雙雙換，寒入深杯九九消。
得氣盆梅偏早綻，向陽籬菊未全凋。
相期並了殘年課，添箇詩筒遣寂寥。

奉送玉峯尚書徐公南歸五十韻

大儒出處途秉道，貴得正行藏。既自斷進退，詎關命我公。
如星雲一出朝野慶，臯夔奮事功。燕許嫺詔令，放之彌六合。
鴻業豈易竟，立朝二十年。風節嚴且勁，高文藉

討論大禮資援証以茲契 聖情題扁字輝映交孚由一
德心愛非貌敬國家有元氣培養在交儆儲材本報國
夾袋記名姓必若入收羅先須覈言行春秋兩校士米
鑒中外瑩大匠洪陶鈞劔光出磨銍別裁務去僞崇雅
自剛鄭豈不歎才難得人際斯盛煌煌起袞手草野議
敢橫中流砥狂瀾公論翕然定官雖謝執法講每直崇
政休沐有常期歲時奉朝請從容大臣體恬退君子性
朝來忽拜疏辭切回天聽 帝曰卿往哉疇爲執文柄
答云臣力憊感激泪交迸告歸遄俶裝首路春維孟
詔以書局隨還家就叅訂牛腰一百車多與二酉競方
輿廣樂史續鑑改陳極高館闢超材名流撤徵聘

謂姜西溟

黃俞邵
諸君

遇榮一時絕典曠千古夔樂天名位似司馬聲

華僅鄴侯未足論矧可擬張邴平生釣游處父老喜相

迎太湖洵幽絕天水俱綠淨七十二烟鬟一一落明鏡

公將開書局
於洞庭山

八窗陳鼎爨四壁開畫燈清音絲間竹逸

響鐘荅磬鶯花晨赴社魚稻晚報禁暑衫便苧葛臘釀

雜賢聖著書閒有餘即事樂難罄小子學無成風塵困

趨趨影慙舞袖短顏讓時粧靚饑朔行自嘲寒郊語尤

硬迂疎頗知量鬪捷肯爭徑振翅無雲霄觸藩有機穽

蹉跎曩悔失鹵莽行恐更世自傾波濤吾方溷泥濘重

來仰翦拂鬱抱實柄柄公在士氣伸公歸士氣病從公

願于邁百感發孤咏

時相約
同出都

送許朔方之雲中

昔我未識子先與錢生

木菴

友亟言平生驩三許不去口

賜谷詩絕倫南交畫無偶朔方年最少蘊蓄靡不有次

第獲論交前言果匪苟燕臺昨于役小許實先後

甲子夏與

玉友朔方同入都

茫茫人海中相左十八九移時一把臂欸曲

心互剖吁嗟輕薄兒覆雨數某某勤拳托末契所得良

已厚方知情親疎不係交暨久風塵有岐路南北莽分

手錢生走從軍余去扶病叟重來會合地驚顧各衰颯

慷慨倚和歌淋漓藉杯酒子仍青兩鬢末座獨昂首也

復可憐生雙顴削而黝須臾雙耳熱擊筑間鼓缶疾風

掃河梁挽斷塞門柳前歡今偶續知有後期否故人諸

曹郎出作雲中守子行赴贊畫側翊義奚取行踪等飛
蓬離緒如剪韭長亭七十五山勢西北走并州非故鄉
却立望南斗

題許霜岩畫扇

風前撩亂萬梢柳柳外天斜一扇蓬箇是儂家舊詩景
江湖回首畫圖中

鳴鶴亭詩爲關中張鳳舉賦四首

不織筠籠但築亭紅欄日日看梳翎人間只有張公子
合向天河伴翼星

隔窗長聽讀書聲識字多來品倍清

金城衛氏鶴日飼以粥教之三年能

識字應咲六郎才思劣羽衣刻木坐吹笙

飲啄依人不自持都緣骨瘦便稱竒雲霄儘有孤飛處
偏愛亭亭獨立時

丈八坡陀尺五天侯門如故客如仙憐他一片毳氎影

曾上羊公舊舞筵

鳳舉爲靖
逆侯少子

題沈客子寒郊調馬圖二首

以下庚午
春初作

潑墨揮毫事事能帶腰吟瘦沈吳興如何却向漁陽道
粘帽茸裘學按鷹

小益戎裝悔浪遊不成投筆取封侯殘年射虎非吾分
白石山南去飯牛

西城別墅十三咏新城王清遠屬賦

雲氣朝出岩亭陰滃然接劃分一片影側展屏風疊浦

口有漁榔落帆如斷葉

石帆亭

戢戢犀角雛斑斑鹿皮籜春來頻改路客過行長錯欲

斬又躊躇萬竿殊不惡

徑竹

秦封五大夫兩生獨不肯托根此得地雙榦鬪清迥老

鶴暮歸巢殘陽在高頂

雙松書塢

虎目逃斧斤輪囷誰惜汝薰蕕自然別靈蠢性所予材

與不材間揣兮知自處

大椿軒

九子得其三五老失其二一峯復一峯峰峯不相似雖

非木假山可少老蘇記

二峯

蝴蝶滿南園風輕草初剪林霏入烟霧古洞春猶淺好

去向龍岩築菴名碧蘚

小善卷洞

迴溪轉灣滾滴翠如滴乳岼容兼水色遮斷橋西浦一

卷落床頭春深夜來雨綠蘿書屋

不離文字禪半偈亦已多何異百千萬烝沙散恒河蓮

華清漏底晏坐夫云何半偈閣

蒼濤翻半空清響一聲作頑仙不耐聽下有側頂鶴夜

深忽飛去簌簌眾星落嘯臺

鵲山出林郭高處割一拳坐令諸兒孫羅列丈人前對

之能下拜米顛豈非仙石丈

草外瑟瑟波波平兩三頃紅鱗尺半魚倒嚼桃花影西

堂夢初覺佳句時一警春草池

仙犬吠靈根鴉耨往堪劊曾隨康樂屐竟入麻源谷一

咲却歸來披圖作橫幅

小葦子副

耕犁起同晨牧笛行向晚小庭閒倚杖正值唱歌返杳

杳漸無聲去村知近遠

樵唱軒

將出都門感懷述事上澤州冢宰陳公一百韻

當代中天治千秋一德期大賢多間出鴻業並昭垂夫子金閨彥名家玉樹枝傳天飛鸞驚拔水出蛟螭理學源流泝文章談咲麾魏科仍早掇雅望迥標持館閣廻翔地風雲獻納資居高懸藻鑑集益藉論思博物時無亞多聞議必詔六曹兼掌故九列讓委蛇共指文星煥寧關好爵縻網維張有自津涘挹無涯溯厥流風遠恭惟樹德滋晉陽丁未季獲澤徧瘡痍團結因鄉社招搖

視義旗千村同保障一姓獨登陴布置隨方畧分明受
撫綏險憑雙堠設烟合万家炊寇至呼咸集歸窮戒勿
追宗人全鐵軸隣叟穩耕犁歲事重憂旱并民又阻飢
九重加軫念百族尚厓羸焚券情相卹嗟來事可嘆甫
田憐士女世祿散京坻積貯崇朝盡陰功里老知當官
嗟覆餗扣戶仰由頤及見家餘慶方知善可爲潤沾千
里遠力賑一方疲地近瞻恒嶽川長入晉祠午園留獨
樂甲第拓前規好古兼金石搜竒及鼎彝異香黎峒結
秘色汝州磁畫幃多裝軸書囊或借篋筆馳中壘陣墨
洗右軍池弟子河汾盛宮牆魯國推名爭歸夾袋坐愛
傍紗帷手引烟霞上情均雨露施賢良承漢策雅頌叶

周詩至化行如此斯文儼在茲升庸 朝有道羅致野
靡遺竊喜逢時泰翻成歎數竒異材胥奮發蹇足獨顛
危詎敢誇華胄聊因述鄙私婺源分未派海表發南支
大理馳封啓中丞畫戟移澤流京兆厚禍發黨人竒世
廟當中葉分宜位鼎司彈章辭激烈伏闕涕漣洏嚴譴
孤蹤逮流官絕域羈左垣言幸中東市魄終褫門子承
堂構文孫接履綦謝宗經鼎盛裴眷有中衰五葉傳清
白全家際亂離兵戈屯井閉榛棘變堂基春誤尋巢燕
秋荒插菊籬先人旋遯跡壯志局茅茨比杜經天寶如
陶閱義廕流光傷易邁風木感先萎小子真無似孤懷
忝自惟墳笈偕伯仲弓冶學裘箕蚤被儒冠誤長遭俗

目欺升沈渾莫定矩獲恐長隳蕭瑟囚山計荒唐捷戶
賞不成終泯沒那得避嗽崎會有從軍役寧甘伏櫪悲
黔山峯轟轟楚水浪差差鉦鼓淵闐發簫笳斷續吹征
夫攀塞柳野客咏江籬戎事從人問行間借馬騎瘴林
棲狒巒箐谷竄狐狸耳聽鶻啼血心驚觀築屍晝紅烽
乍舉月黑路偏欹短褐星埃入遐陬露布馳圖披新聚
米局按着殘棋橫草名空挂封侯望本癡飄然辭幕府
逝矣走京師古有矜懷刺時方薄處錐姓名埋失路出
處謝端著徒步親頑僕低頰向細兒幾逢收駿骨深畏
妬蛾眉久抱違時性蕪無媚俗姿泥深蹄蹙蹙風逆羽
襴褫逐伴聽謠曲無聊托酒卮波瀾人海濶竿木戲場

隨照壁寧防蠍吹毛竟得疵任安書未荅朱穆論何疑
夢或驚沙域歸將友澤糜棄繻知昨失鑄鐵悔今遲不
謂逢韓愈猶煩說項斯感公寬禮數容我揖堦墀未有
阿房賦徒懷北郭絲迂踈疑寸管許與到單詞岫置干
尋壁弘開八達達春陽蒙煦噢霽月曙光儀欸欸憐才
意依依戀別時爨薪餘樸檄鍛竈仗鑪錘黻隸雲敷土
微茫海測蠡義高攀莫及身賤語終卑此去鞭重把何
年閣再窺鷗波殊浩蕩泛泛問何之

送徐道勇宰順德

萬里驅車路韓蘇蹟尚留往時愁謫宦今日羨吟游邊
海夏無瘴看山朝有樓感君懸榻意謂我是詩流

時相約同

行余迫歸
計不及赴

酬別許暘谷

男兒有才人見之如眉在額指在掌
蘭苔翡翠大海鯨相去中間幾霄壤
天資必從學力到拱把桐椅視培養
方今濟輩盛稱詩萬口雷同和浮響
或模漢魏或唐宋分道揚鑣胡不廣
何曾入室溯流源未免窺樊借依傍
我持此論嗤者衆同志吳中乃得兩
惠生元龍格律最謹嚴錢子玉友
才情殊倜儻不知此外復誰敵
晉楚居然互雄長得君忽訝鼎足成
一戰三分定擾攘君才自是詩中虎
盡遣風雲歸俛仰蜀江到解一萬里
岱岳登峰八十丈有時分派蓄烟波
間亦浮嵐滄林莽初看澹沲與

神會倏轉玲瓏非意想書評取瘦嘲杜陵畫品近肥关
周昉穠纖斟酌雅粧宜骨月停勻神駿賞愛君此境口
莫喻俗手安能事樵仿彼非識者勿浪傳若有知音必
弘獎余雖好吟久成癖所業未充終惆恍邇來屬藁輒
欲焚偏仄無端櫻世網徒將字句供指摘豈有聲華出
標榜此時披豁喜相從乍挹西山朝氣爽論早引我爲
同調鳥爪時時發背癢君辭愈降我愈慙文繡飾犧毋
乃枉皇天老眼不到地半世駢馳絆塵鞅三間草屋百
索田願本非奢力難強我今忍飢亦決去麋鹿山林合
長往閉門更讀書十年尚冀成章附吾黨故人倘記臨
別約鬪鴨欄邊好相訪數折溪橋蕩槳迎歌聲正出蘋

花港

夜飲槐樹斜街花下
酬別竹垞水村

丁子香邊欄檻小
桃花底杯槃厨燈隔院人靜社雨添

衣夜寒殊方賦別最苦
失路還家又難懊恼鶯啼時節

相思多在春殘時余將南歸

酬別譚護城都諫

知已無如我少交情
得似君難獨留一榻相待長把深

杯對乾宣武門南
舊宅虎坊橋畔扶欄可惜手栽紅藥

花開又讓人看虎坊橋東舊寓去秋曾種芍藥八本余將歸君又遷居故末云然

題壁集起庚午二月終六月

玉峯大司寇徐公
予告南歸奉
旨仍領書局

出都時邀姜西溟及余偕行兩人日有唱和旗亭
一堦館汙壁書牆率多口占之作本不足存存之所
以記行跡也

早出彰儀門魏禹平談震方沈客子追送於十
里之外馬上留別二首

已着征衫上別鞦道傍何意復停鞭人生聚散原難定
又算班荆一度緣

杏蕊開時柳葉新眼明差喜出紅塵京華回首無多戀
萬疊西山幾故人

長新店重別孫愷似王令詒嚴寶仍劉大山家
荊州兄三首

尚書書局出隨身供帳
爭看祖道新轂鯨車輕
啣尾去可憐我亦一歸人

壞壁尋詩又一回
殘尊重洗別時杯
不因此去添悵
輕跨征鞍自悔來

別期長短路連綿
春淺漁陽二月天
却檢曆頭同此日

驚心南北忽三年

前年南還去年北發今束裝出都俱二月二十一日亦一奇也

良鄉次西溟韻

乍來灰洞喜無風
馬足殘泥曉漸融
料石岡邊春雨晚
廢田無麥草葱葱

琉璃河次湯西厓壁間韻

日痕紅曙露初晞
草色迎人欲上衣
頓覺水鄉風景好

一群野鴨踏波飛

寒食過涿州和西溟

柳色初濃凹字城胡良河上偏清明故園三百長亭外
貪得花時一月晴

清明新城道中

縣南風颭酒帘多澹澹新烟瑟瑟波一路人家齊上塚
紙錢飛過白溝河

白溝旅店見亡友鄭樊圃舊題愴然有感同西
溟作

一鞭重度瓦橋關落魄星埃鬢各班忽見故人題壁在
轉憐爾我是生還

過趙北口晨餐得魚戲和西溟

淼淼波光漾碧虛中央一帶是民居綠楊影裏曾竿起
彈鋏人歸食有魚

任丘遇禹司賓尚基歸自閩南以蜜漬荔枝分
餉

易粟寧桃已厭嘗愛聽風味說南方費他陸賈千金橐
與致紅綃十八娘

商家林早發

村店荒荒殺漏遲喚回殘夢眼迷離曉星一箇明如月
及取朝陽未吐時

冉家橋

楊椿夾岸草抽芽一綫枯河萬斛沙記得去年鞭馬渡
滿渠春漲拍桃花

景州次西溟韻

時畿輔
苦旱

自從騎馬出春明滿眼流移愴客情此日畿南行向盡
喜逢田婦餉春耕

平原口占戲示西溟二首

碌碌因人事竟成當初原未識先生處囊脫穎渾閒事
何苦區區自請行

若將毛遂比夸門知己何人合感恩却咲能詩李長吉
信陵不繡繡平原

夜雨

倦枕更闌睡不成
白楊葉戰雨來聲
油燈欲滅尚未滅
睽電隔窗時一明

從十里望抵晏城

春暎雨潤少飛沙
別取林均一道斜
紅袖倚門桃傍井
又緣迷路得看花

大清橋

風柔自覺輕衫便
山近微嫌濕翠多
日暮大清橋畔望
一叢春樹擁齊河

崗山

古驛東來路一灣
萬枝翠栢護蒼顏
不知斤斧迹何幸
大似吾鄉近海山

上巳泰安道中和西溟

平山堂畔忽經年，又是荒程上巳天。
慙愧漿家供野味，樹頭小串摘榆錢。

欲登岱不果戲東周通守燕客

潮白三更開島嶼，烟青九點散齊州。
他監稅周簽判，日日肩輿到上頭。

羊流店

峴首沉碑事渺茫，空傳有淚墮襄陽。
居人自重羊公里，未必英雄戀故鄉。

新泰城南望蒙山

翠岱孤抽碧玉簪，群山餘勢失嶰嶰。
晴雲忽斷東南角。

又露東蒙一兩尖

發蒙陰至青馳寺

桑邊棗下歎崎路亂石堆堆數驛亭野草不知春意好
燒痕三月未全青

渡沂水

白沙沒髀水平腰舟子招人上小船拍似翠華南頓路
舊年此處有浮橋

三月初九日自郟城看桃李至紅花埠二首

枝枝能白復能紅光景年時約略同行過曹村貪小住
雙禽對語百花中

油菜花開十里黃一村蜂蝶鬧斜陽明知尚隔江淮岸

風物看看近故鄉

官柳

種柳河干比伐檀黃流今已報安瀾可憐一路青青色
直到淮南總屬官

大雨早發宿遷

洶洶波聲響濁流疾風吹雨渡潮溝眼前一事差強意
河北人家麥有秋

晚晴入桃源界和西溟

鳴鳩聲裏發孤城行到桃源落照明一色東風占兩候
曉程催雨暮催晴

渡河

沙雨晴來日氣和，漲痕連岸落帆多。
春風吹過桃花信，啼鳩一聲人渡河。

淮安上船

厭聽鈴聲愛入舟，只應洗耳向清流。
瓣香夜謁淮神廟，夢穩江南第一州。

過喬石林侍讀縱棹園

一天風雨禁茶蘼，紅藥空欄信尚遲。
只道淮東春已盡，鴨桃猶剩兩三枝。

喬侍讀席上贈歌者六郎

欲顧曾無一字訛，子絃徐引曼聲歌。
青衫憔悴無如我，酒綠燈紅奈爾何。

高郵舟中

蔣牙荻笋碧於天，涸水瀕湖出葑田。
鷗鷺較多人較少，斷橋邊有賣魚船。

揚州遇杜蒼畧

龍眠

方邵村侍御

又繼黃岡歿

謂令兄饑鳳先生

江左風流跡已陳

今日聽君談往事，如逢天寶舊宮人。

王羲文間復申招同西溟泛舟紅橋二首

誰家園子得春多，繭栗梢頭花信過。
一曲紅欄隨棹轉，綠陰濃處忽笙歌。

十里珠簾廿四橋，百年花月履綦銷。
多情愛拂遊人面，尚有垂楊萬萬條。

西溟談及竹西舊事戲調之

綠楊書畫記停舩一夢揚州又十年見說伎樓渾冷落
鬢絲誰惜杜樊川

阻風瓜洲望金山

狂飈高駕海疊開雪浪千堆倒捲迴霧氣欲吞吞不得
紺宮浮出小蓬萊

月下渡揚子江次西溟韻

妙高峰下曉鐘撞隔岸吳船正發幫風露一天人擁被
櫓枝搖夢過春江

虎丘後山人家

築岸開池別有津小橋低映白石鱗鱗河豚上後魚花賤

多少山根種水人

閩門卽事

穠花剛被樓遮却又見隣墻出好枝
一種風光誰管領
金閩門外暮春時

吳江

鱸鄉亭畔麥垂芒水落潮田已半黃
曲折支流通小港
家家門外有船坊

禾中田家

到耳初聞鵲鵲啼平疇小稜趁高低
茅針已老桑芽嫩
時節人家正簞泥

過梅里訪朱西峻

也知陟岵意仍違纔得還家換袂衣爲報而翁吟望久

白頭京國苦思歸

竹垞先生尚留燕

題家保三兄小影

分無擁髻對伶玄赤脚歸仍侍玉川怪得披圖還一咲
破窗難燭看神仙

題西峻月波吹笛圖二首

苔樣蓑衣綠蓋篷輕篙閒插月明中水禽兩兩背舩去
獨倚蕢洲一笛風

一天雲細作魚鱗千頃頗黎瀉濕銀解聽鶴南飛曲好
不知誰是倚樓人

柘湖感舊和徐淮江

滿湖輕浪綠差別樣風光兩度期楊柳半帆春載酒
薔薇一硯雨催詩未知此後花誰主可惜重來鬢已絲
早是驚心八年事夢闌燈爇不多時

齊門夜泊

扁舟蕩漾具區東使盡西南一日風到岸帆檣烟幕幕
隔河簾閣雨濛濛忽來人語蛙聲外亂颭燈光水氣中
也識去家今較近酒闌依舊感飄蓬

吳門喜遇田間先生

髮光如葆氣如虹強人間八十翁最喜塵埃經歲別
還看筋力舊時同文章有品傳方遠風雨藏山業未終

藏山集先生未刻詩文也

指與一星人盡識少微今日客吳中

崑山劉改之先生墓和顧伊人

哀壑無人叫杜鵑
馬鞍山麓古墳邊
東齋路沒荒榛雨

東齋先生祠
堂也今廢

北郭人犁斷碣烟
湖海尚疑豪氣在
姓名

翻藉布衣傳冬青
種後諸陵廢南渡
君臣更可憐

題沈石田秋江待渡畫卷

晶晶波明鱗舍
茗茗路轉漁灣
落葉聲中問渡
浮萍影

裏看山

題陸漢標墨菜圖

小圃朝來露未晞
早菘青脆晚菘肥
老饕不要園官送

旨擬從君攫畫歸

武林寓舍少司馬楊公以鮮荔分餉賦謝

絳囊移得洵仙才珍重瓊漿贈十枚不向紅塵馳驛到
却從碧海販鮮來色香尚覺熏肌好冰雪真隨咲口開
只是野人慙過分恍疑身自雪峯回

范石湖集四明海州自福唐來順風

三數日至得荔子色香都未減大勝戎涪間所產
曾有詩云艸船荔子如新摘行脚何須更雪峯

四殤詩

家貧望多男如農力苗畝將期秀而實焉得辭勤劬吾
家兄弟間盛事傳鄉閭仲氏艱舉子前年獲騶虞季子
善生兒爛熳引衆雛我兒稍長成次亦舞勺踰豈不顧
恩誼未免督責俱嬌穉尚無知愛憐併屬渠阿巢甫七
齡性慧早讀書近尤喜作字狼籍塗墨豬騶虞頭角好
秀眉清兩曠學語無不能舌本驚老儒阿載方斷乳氣

壓群兒愚家僮聽指麾步步趨亦趨最小名阿午哇哇
聲已殊今年暮春杪我歸自燕都次第使來前琳琅玉
璠璣排成一行雁聚若同隊魚公然嫌姆抱見伯同爺
呼漸熟意轉親競前爭挽鬚無何捨之出我又東遊吳
五月到崑山梅雨蒸肌膚去家五十日頗怪一信無濕
螢照昏花雙眼交模糊群來入我夢繞膝形蘧蘧明朝
急買舟宵暍返敝廬到門天已黑哭聲滿庭除驚問哭
何爲痘殤瘞泉壚一哀吾欲絕老泪沾襟裾自惟世業
荒寶此七丈夫半月奪其四嗚呼彼奚辜季子僅留一
芝焚蘭未枯仲氏一併亡竟失掌上珠矧乃客未返時德
尹尚在遠隔天北隅便擬報杏殤作書寄江湖又恐傷

都下

汝父臨緘復躊躇中腸集百念沈痛肯暫攄家門百年
來天闕代有諸曾王父早世我祖實少孤兩叔及先君
長短歲月徂短者纔十九長者五十餘同祖凡八人其
三已丘墟早衰我更甚所歷多崎嶇浮生知幾年煎迫
非一途傷哉感存歿天意終何如

苦雨聯句

風噫作欠伸

顧圖河

天愁散咳唾幕幕繭絲微慎行拊拊箭

鏃大排欄挂水簾

圖河

震瓦响雲磨隙景列缺馳慎行潛蹤

鬱儀過衣纓黝黷醜

圖河

扉履濺泥污蝸噫引長涎慎行甃

怒鼓群和喙按聚蠅餐

圖河

瘁肌飽蚤餓嘔噦減食單慎行

撲緣廢書課帖席惡膠粘

圖河

歷階防跌蹉遙岑罨如道

慎行高浪騰誰簸方當戒舟杭河圖矧迺疲鞍馱溝明濼齊

腰慎行田塍淖沒髀落衣妥兩肩河圖烟殼背一箇栖畝占

來牟慎行分秧滯杭稔青葱卓針立河圖黃萎垂芒臥造物

有暴殄慎行農功豈媮媮乾土盡翻沈河圖漏天難補破餘

飛遠乍散慎行晚色晴微作暑濕旋復蒸河圖壯陰那肯挫

走章牋碧翁慎行苦雨毋受賀河圖

敬業堂詩集卷十一

敬業堂詩集卷十二

海寧 查慎行 悔餘

橘社集

起庚午秋
終十二月

橘社在洞庭東山之麓劉氏取以名園秋冬間假館於此與書局諸同人唱酬不少膠城張漢瞻爲鏤刻于吳中者非足本也

將赴洞庭書局雨中與徐淮江別二首

一領西風季子裘亂砧聲裏又殘秋
人間尚有君憐我
每過南湖作少留

小港平橋宛轉通船頭一片採菱風
孤燈十載江湖雨
腸斷瀟瀟此夜中

曉發胥口

半浮半沒樹頭樹乍合乍離山外山借取日光磨一鏡
吳孃船上看烟鬟

渡太湖晚至東山

秋水如膏滑上船峭帆衝破五湖烟豈知地少雲多處
別有橙黃橘綠天枕簟欲清他夜夢杖藜行結好山緣
詩人愛入雞豚社橫烟裊處雞豚社范石湖遊東山詩中句只欠躬耕十畝

田

山居詩次大司寇徐公原韻二首

得從林屋賦閒居勝駕還朝四望車萬頃波濤憑檻外
一天風雨落帆初龍威寂莫重搜字笠澤叢殘舊著書

復與伊川同擊壤何妨問答到樵漁

公歸海內重儒宗不數瑯琊邴曼谷霜晚黃分湖岸稻
烟朝翠掃寺門松晴來片片雲盤鶴雨過條條澗飲龍
見說莫釐峰絕頂時陪五老握青筇

落托生涯最善愁慙來我亦欲忘憂淋漓命酒長連夕
次第看花已過秋四壁書多仍萬卷五湖人少但扁舟
西山勝概差能說興到還期爛熳遊

張漢瞻有喜余至山中之什次原韵奉荅

啣尾船開古渡頭榜聲導我向中流似曾有約來同日
不比無聊賦獨遊坐擁畫屏長對榻

時同寓
敞雲樓

行逢精舍

必登樓因君撥觸聯吟興豈可湖山少唱酬

同徐敬可吳西齋張漢瞻遊翠峰寺和漢瞻韻

陰雲解駁日光穿行盡松門始見天旛影自飄空翠外

樵歌時出斷碑前經樓晝靜孤鐘發井石痕深萬縷牽

我欲問龍還乞水與君洗眼對殘編寺後有龍井為雪竇禪師故蹟

遠翠閣和漢瞻韻

處士留陳迹閣為陳眉公所建軒窗背嶺開練光鋪几席烟氣

濕亭臺林僻僧宜少天晴鶴未迴共拚吟遣日無事定

重來

微香閣次敬可韻

蘚徑碧侵遊子屐楓林紅上羽人衣一聲清磬落何處

坐看香烟成翠微

二峯和漢瞻韻

儼與莫釐並所爭惟一拳未應甘出袴且喜得隨肩潮湧東隅日雲垂北面天短筇如健僕扶上最高巔

登莫釐峰二首和漢瞻

青天七十二芙蓉個是芙蓉第一峯吳越有山多作案東南無水不朝宗盪空日氣消飛蜃拔地風聲穩臥龍曾記岳陽樓畔望肯教雲夢芥吾胸

百層風磴盤旋上大似鞞鷹乍解條放眼不知何處盡置身直覺此峯高沈沈海浦黃雲岸點點吳帆白鷺濤未免傷人唾好事重陽已過興仍豪

時重九後四日

敞雲樓次顧丈景范韻

堵牆高下列丹楓平視茫茫但碧空地迥最宜千尺上
景竒獨占一山東湖光夜閃疑飛電磴道秋垂似偃虹
多媿元龍豪氣在每聞清嘯發樓中

姜西溟繼赴北闈今仍下第作詩招之

散是飛蓬聚是萍可憐南北總飄零一名於爾何輕重
雙眼從人自醉醒沙路離離鴉接翅霜天矯矯雁開翎
此愁除有詩能豁取買歸舸下洞庭

題劉氏東樓

連山正缺西南角合有高樓面太湖不許遊人誇目力
淡雲濃日兩模糊

出雲篇和西齋

山以東得名羅列非一嶺兒孫丈人行屈首殊未肯今
晨天忽雲晴色變滄洞蒸蒸氣浮盞冑烟上并衆峯
處囊中刻露錐出穎一峯獨埋沒有物踞其頂陽鳥從
東升對射却無影林寒不受照萬象淒以冷大風西北
來作力一何狂奔逃脫鱗甲破碎寧復整正賴湖腹寬
吐吞在俄頃山人耳目炫夢囈喚初醒重看莫釐高乃
若裘挈領

送田間先生歸桐城兼寄高丹植明府

滿篋詩文手自編秋風攜上皖江船氣吞湖海豪猶昔

老閱滄桑骨已仙愁裏豈堪論往事

先生詩集中有與先君子長干酬答

詩部中容易著高賢馳書早報樅陽令薄少時應致俸

錢

菊

隨分沿溪細作行
開時何必定重陽
畦丁自愛無他種
橘柚連山一例黃

山樓曉起

枕上秋風疑有雨
覺來已是日高時
拓窗簌簌隨黃葉
蒼鼠驚人竄別枝

晚窗即目

變態多從咫尺看
只爭濃淡淺深間
斜陽已落月未上
烟外數峯如遠山

木芙蓉索漢瞻和

烏柏微丹鴨脚黃爭將病葉領秋光後時猶作好顏色
咲爾一枝紅拒霜

自題放鴨圖小影後四首

偶煩妙手寫吳綾未必扁舟興便乘一咲披圖還作識
此來真箇住松陵

淺水蘆根咬啞聞背蓬
泂尾雪紛紛湖中別有東西鴨

飛向遙天莫亂群

東鴨西鴨太湖中二山名

竒絕佳名屬兩山新詩多著畫圖間放船不怕人爭路

自占儂家第一灣

東洞庭有查灣西洞庭有查山見震澤編

不用低欄照水紅一竿活計趁樵風江湖老伴憐渠在

踏浪長隨卅角翁

東坡詩我衰寄江湖老伴雜鸞鴨孟郊詩何如卅角翁至死不裹頭

食橘二首

樹樹垂垂顆顆勻山家生計不愁貧若教朱實仍包貢

那得分甘到野人

洞庭貢橘唐宋時有之至明始罷瞿佑宗古詩有玉食無緣進上方之句

小園一百二十樹摧壞年來成橘薪每到霜前悲手澤

可堪客裏又嘗新

西園橘栽先人手植也已巳冬寒悉皆凍斃故及之

漢瞻自洞庭先歸詩以志別即次見贈舊韻

兼旬索句添窮忙草根唧唧蟲鳴霜尚慙皮陸作唱和

敢與李杜爭光芒君詩盡納三萬派山骨巉巉波洋洋

登壇欲來執牛耳取徑故險迴羊腸林深霧黯蓄幽氣

虹見雨霽開晴光吟從舌端作倔強寫向紙面生低昂

稍嫌工遲似司馬容我咲傲林泉旁憶初弭棹同臥起

明朝聯臂登高岡穿松踏石困俛仰攀躋中道多徊徨
竒峯忽拔二千尺快劍磨出蓮花鏗聳身側足狂叫絕
生平竒境得未嘗三湘七澤舊雖到却溯洲渚攀孤芳
黃金荒臺感燕士畫棟高閣悲滕王十年浪走癡已極
游蹤脫畧失故鄉星埃大咲一回首攝衣纔謁三高堂
所嗟筋力就疲憊漸遣興趣成頽唐眼前又當搖落候
薰葭露白秋蒼蒼不知此中有何樂對爾意氣還飛揚
男兒生涯志未豁善刀合學庖丁藏百觚醉汲隣叟甕
一枕倦寄高僧房得道在先成佛後茲理反覆天應償
逢人但拜孟東野去我獨惜張文昌扶筇縹緲有夙約

與漢瞻約游
西山未果

宵計盜底無餘糧風波衝冑總爲此子今

束書我亦將行當長謠蒼黃竹不爾妙曲賡紅桑鬱鬱

誰能耐離索空樓夜雨思連床年來万事經眼見窮達

竟分姜與湯不分窮約姜與湯漢瞻舊句也謂西濱西厓舊遊如夢那可說

祇有末路堪評量名山業豈異人事慎勿屑屑耽詞章

夜坐有懷張漢瞻吳西齋二子相繼別去

山谷天早寒經檐白日速夜長耿無寐愛此一寸燭展

卷乍沈吟開軒屢躑躅我唱和者誰凄其感幽獨別時

秋林下錦纈黃映綠幾日不上樓敗葉忽已秃悲風颭

然起槭槭響枯木靜覺流光移暗傷懷抱觸小僮強解

事隣釀貫新熟酒罷還夢君湖心浪如屋

重登莫釐峰望吳興諸山

吳會諸峰繞作環荆溪百瀆瀉成灣西南遠景新收得
一髮螺青是弁山

從渡水橋步行至武山小憇吳氏園亭十四韻

過橋纔半里空濶得平原野艇笭簪渡斜陽擺種村晚

來魚論斗

吳志云吳俗以斗論魚二斤半爲一斗

僻處犬依樊歲稔松醪

賤秋辭社鼓喧草根驚雉起

洞庭志東山有雉而無兔西山有兔而無雉

木

未見鷗翻面面帆移岸家家水到門泉清能止渴山淺

易尋源又接攀躋路重窺種植園罽衣橙刺密耀眼橘

頭繁舊葉荷傾沼新泥菊上盆苔滋行每滑石好坐能

溫隔竹傳壺箭隨花倚畫軒何須問生理即此是仙源

遠色蒼然合歸途月有痕

欲往豐圻看楓葉爲雨阻

山中築居如築城往往人家背山住連街接巷比通闌
雖有林巒無曠趣敞雲樓東鴨脚木亂葉成堆稍通路
此中合着杜門人一月出遊凡幾度我生夙嗜久撥棄
祇有吟情剩如故頗聞人說豐圻勝况有丹楓照秋暮
魚蝦市遠風不鯉橘柚園深香作霧朝來折柬約溪友
預飭晨炊治遊具住山復作遊山人此事寧防天亦妬
初看靉靄雲似墨忽聽淋浪雨如注客言万事難逆料
投足無端動關數豈知勇怯總由人老嬾逡巡坐自誤
憶當涉世氣鹵莽浪走風塵飽霜露衝泥驢背不自惜
到此翻令限跬步天工作意不肯晴明日披蓑杖藜去

大雨同胡朏明閣百詩登湖樓

大聲拔湖洪飛上巨鯨背歎空作猛雨倒射怒百倍
万木助一喧掀騰走群怪樓孤若搖動勢已岌岌殆雲頭
排窗來山影忽在外目存思欲絕境變竒乃最我詩苦
難工傑句應有待

順風渡湖瞬息抵胥口

匹練掣柁痕虛弓曠帆勢不知小榜迅但見青山逝孤
塔表靈嵒卓針辨湖溼須臾忽到岸轟轟在天際

虎丘晚泊

山淺橋平水一隈幾株紅樹寺門開從看小景如盆盎
新向湖天放眼回

拔白詩 并序

昔蘇子由有白髮近二十年虔州道人王正彥教令
拔去以真水火養之從其言數月而白髮不出因作
詩自言拔白之驗余今年忽有白髭二莖攬鏡鑷去
且三月矣竟不復生喜事有偶合者因用其意作詩
一章然養生家言僕固不解也

人生疋庭樹官骸乃皮膚樹有花與葉人有髮與鬚花
葉本斲榮鬚髮那不枯我今過四十貌作山澤懼憂患
煎心神奔馳瘁形軀早衰理則爾何用長吁嗟雙鬢久
星星見慣習與俱白髭忽新變刺眼生躊躇我欲撚使
斷苦吟徒自愚我欲媚後生染之非丈夫不如竟拔去

誰能忍斯須初若蠹蝕葉幾片離根枝又若耘除稂良
苗漸蘇蘇爾來九十日萌蘖喜絕無養生素乏術寸田
任榛蕪何當劬黃精白髮併掃除

朱雪鴻移居詩和梨洲先生

濛濛天地總羈縲瓜跡何煩苦印泥招隱莫分山大小
卜居難定讓東西一舟最穩裝書重四壁初安待客題
終勝梁鴻依廡下年年井臼累山妻

雪夜發玉峯數日前沈昭嗣呂山瀏顧書宣先
往洞庭作詩寄之

落木灣頭雪灑燈臥聞漁子尚牽罾寒光潑被夜如月
野水割船冬始冰風逆不知何日到山高宜及此時登

湖天霽色詩兼畫待我舟中酒二升

從橫塘晚至木瀆舟中寒甚

西北風狂野氣昏船窗擁火取微溫殘陽正墮塔邊寺
薄雪未消湖外村木盡脫時喧鳥雀稻成堆處散雞豚
可憐歲晚不歸客對景躊躇思故園

雪後曉渡太湖

黃蘆吹斷黑頭風寒日初生血樣紅一片湖山新着色
萬螺浮白碧壺中

次韻荅趙蒙泉閩中見懷之作

得喪年來已貫經忽披佳句又心驚計疎更事多成悔
身賤依人自覺輕壺口欲從敲後缺劔鐔猶發扣時鳴

來詩有先生豈不平鳴句
短檠墻角差難棄賴是看書眼尚明

王令詒自閩歸出示途中見寄二章次韻奉荅

船頭船尾榕陰綠城北城南荔子紅懊恼此中多賦別

勝遊從古幾人同

右荅南浦見寄

自攜驢券出都城草草裝隨短策橫失路歸添遊子淚

加餐書荷遠人情愁隨越鳥方南向懶趨邊鴻又北征

不用苦教詩激楚漫天風雨正秋聲

右荅晚泊見懷

送山瀏自洞庭歸塘西兼寄張介山陸厚容金

子由諸子

無多唱和留君集來往真如相避然一葉驚回三載夢
兩萍漂散五湖天新書著罷從人笑善病同時得婦憐

山劉聞嫂夫人好向橋西呼酒伴
放狂作達過殘年
抱病已亦致疾

雲石菴和書宣韻

一徑入雙塢

菴在大塢小塢兩山間

遙從澗道求泉枯行汲遠竹

密得窗幽日氣通
停午濤聲捲上頭
踞高真得勢矮屋

也如樓

白龍泉和沈昭嗣韻

半嶺通湖眼
閒僧護井湄
自能清徹底
何用砌成池
鳥道尋難到
龍湫怒或移
不知風雨候
可有氣如絲

來鶴樓和韻

樓址為某姓葬地

舊日松楸廢
何年笙鶴來
樵人憐葬域
山鬼避香臺
峰勢重重合
湖光灑灑開
步虛人罕到
猜是小蓬萊

題書宣小影

十萬青鸞尾搖竹映得詩人鬢毛綠此中可少三間屋
竹西三月桃花紅前村後村烟濛濛此中可少一扇篷
遠勢兼收隔江塔指圖山也與君作詩論畫法借君門前來
放鴨

書宣以藥酒一罍見餉賦謝

北風夜半收鳴鼉冷光浸日湖不波對門老樹盡僵立
枝顛斗大鵲作窠山人畏寒臥復起排籤十指無人呵
雲間陳翁山農好事者乞與方法招詩魔酒材難致藥料
貴正苦羞澁囊無他感君餉我分一罍何異良劑投沈
痾甕城新開香繞鼻瀉以碧椀承紅螺甘分沆瀣光瓊

珀村釀不數黃如鵝卵時小酌午未醒挾纈續乍回陽
和蓬蓬入腦聲自覺粥粥浮面顏微醺枯腸一洗枵藜
出老眼亂瞥昏花過肩高尚吟薄薄酒耳熱漫作烏烏
歌井湄效箴咲揚子春色可賦煩東坡犀首達生坐無
事袁絲遣日知亡何有生得此亦過分况敢嗜好窮搜
羅偶將一醉累良友亟饋莫必惠已多預愁餅罄唇吻
燥挹漿那得翻天河

書宣次韻見荅復倒用前韻作一章邀余繼和
時書宣將歸揚州兼以贈別

君才如漢江淮河駕天輪浪豈患多坐批百家目炯炯
行貯四庫胸羅羅詞源獨騁曹植富餘地不量繼者何

金丸脫手最輕捷快馬直下胭脂坡朝來赫蹏急傳示
白雪竟壓巴人歌我時解鞍息蹇足臥看縱轡奔騰過
吟情欲探酒力發小戶一盞熏顏酡平生有作每倔强
音調太急絃難和醉來反嫌天地窄局促未免愁籠鵝
團團陳跡走循磨眩眩纈眼光旋螺爾來檢點稍知悔
思以勺水滌前痾可憐故態時復作形雖近放心靡他
人生有情會有癖湛詩麴蘖俱成魔何如牢守昔賢戒
不吟不醉從嘲呵逝將嗇養全晚計野蠶簇繭蜂藏窠
子今勇決乃過我氣盛不怕江翻波臨行舉杯懣口業
拔劍倘斫生蛟鼉

以藥酒分餉唐實君吳西齋再疊倒韻索和

鷓夷瞞腹鼠飲河就中滿貯得幾多玻璃万頃吸不盡
霜風吹淺如碧羅詩人氣麓言語大鑄琢造化將誰何
婁東二生我同調得第厭上金鑿坡竭來忘分更莫逆
銅斗許和寒郊歌湖心淺山住隔巷衝凍踏月頻經過
所慙才分非爾敵頰面未飲長先醅愁腸酒肺互撐拄
正賴藥味相調和長瓶分餉良有以願奢似挾山陰鵝
鷓鷄聊足注半杓鸚鵡恰好浮雙螺便從唐侯促佳句
實君許題放鴨圖詩尚未至更祝吳子蠲微痾時西齋屬微疾號呶當筵誰
是主剝啄扣戶人非他林麴木客盡逃避氣豪橫欲駢
群魔此間差無俗物擾尚有亭長能相呵懷哉歲暮盍
歸去坐看日夕雞棲窠小槽溜溜聽壓蔗饒涎亂湧珠

跳波床頭一壺堪醉倒不知門外傳更鼉

題鄒毅仁書劒圖

學書差足記姓名學劒無過一人敵英雄竟以成敗論
二語千年供指摘我持此論君勿疑潦倒粗言身所歷
方當出遊氣盛壯逸足誰堪受羈勒有文曾詔弔戰場
有力能誇控鳴鏑蹉跎祖述難着鞭爛熳陳琳徒草檄
收身十載赴場屋往往雄風避雌霓眼看騏驥盡先登
鴛鴦悲嘶仍皂櫪天涯行旅慣黑瘦世上男兒多白晷
讀書擊劒兩無成鄧禹笑人終寂寂子才去我固十倍
射扎穿楊準懸的胡爲垂翅亦襜褕予美誰俯仰有鷗
三年秦牘困方朔五十吟詩咲高適馬應換妾刀贈人

龜手如何學緝緝薄田可耕池可釣良耜畷竿籊籊
還君此畫一展然寒盡知年不須曆

梁溪馬碧滄索題桐山草堂

吟徧峰頭又水涯九龍歸夢隔烟霞期君早種十年樹
待我來看三月華藥錄欲傳須手著琴材若中有人誇
不然斗大成何用万里丹山客是家

諺云梧桐大如斗主人出外走

題鄒舜五采蓴圖卷子次陳眉公舊韵

斂舷聲動吳歌起沙戶生涯雜魚米此中有蓴誰識之
埋沒蒼烟白蘋裏湖波太淡無鹽豉葉自青青莖自紫
脆如雪藕滑春冰異產寧教饜紈綺紅鱸四腮差可配
二老朝來動食指弄潮踏浪去何憂占斷湖心一片秋

百年好事留詩畫從此流傳到武丘人間網利多堪慮

莚擔年年入城去未應澤畔少清流却與貪夫供七箸

太湖中產蓴前此未之聞也天啓壬戌秋武山鄒舜五與陳眉公始採而食之眉公因繪圖以紀其事

發東山至石湖舟中大雪與蒙泉雪園分韻

忍別東山去依依尚有緣雲沈上方塔雪重石湖船密

坐可無酒敝裘終勝繇范村留故宅欲訪向誰邊

宋范致能

居此地名范村

雪夜泊胥門與蒙泉抵足臥

野泊五湖東迷漫雪滿空水明千雉白人靜一燈紅亂

橈雞聲外輕寒酒力中殘年歸夢濶惆悵兩心同

雪後至閶門換船

北風吹樓臺白日雪打面閭門十萬戶咫尺不可辨歸
舟一葉輕欲與嚴寒戰所欣吳中稔酒價冬來賤我裘
雖云敝一醉煖堪戀尚有無褐人忍饑言霜霰

吳門橋阻凍

白日淡無色北風吹作陰浪增冰力厚橋插凍痕深已
近故鄉路偏傷獨客心

是日蒙泉
歸膠城

隣船如比屋兒女盡

吳音

入胥門訪薛孝穆不值留詩示之兼簡許暘谷
錢玉友

風止澤腹堅篙輕不可鑿短篷壓頭臥竟作三日惡賈
客聚連橋荒灣比村落人群自歡笑而我無處著遂訪

薛逢居衝風入南郭初來殊奮迅欲去轉寂莫窮途所

向昧妄冀朋友樂錢許初北歸合并有成約

十日前王友陽谷自

燕中夜虞山期於吳門相晤亦為冰雪所阻

參辰在咫尺矧乃道里各天寒

歲徧臘何以慰離索興盡返孤舟獨吟還獨酌

打水詞

寒光射川如浴鐵千艘萬艘陷頑石鑿山通道古有之
河伯憑堅蟻難穴官船自倚人力強冰椎亂擊船兩傍
船頭乍開船尾結去岸却泊河中央篙師咲謂官勿爾
世路升沈總如此若將人力與天爭倒捲天河應瀉水
阻冰七日始得發舟

筮易玩其占七日當解凍朝來覘風色東面柳初弄天

行旣來復人力漸可用南船鑿冰來銀浦作流豕小僮
報奇事水活鱗甲動老夫亦欣然私喜言幸中披衣促
解纜一咲破愁夢梢梢啣尾行線路爭一縫虎齒截兩
涯倚棹誰敢縱遲遲計尺寸去去逐儕衆到家庶有期
春麥尚及種茆檐曝初旭宿火煨老葑旅食饕風霜何
如抱飯甕作詩當箴銘悔往聊自諷

夜泊平望驛橋下

換柁開吳江收帆宿平望環橋橫吾前天勢墮空曠或
言虹下飲比擬猶未當分明半輪月初吐碧波上風定
川不波上下巧相况小舟入圓鏡光景互摩盪夜寒人
語稀獨此發孤唱

敬業堂詩集卷十二

敬業堂詩集卷十三

海寧 查慎行 悔餘

勸酬集

盡辛未
一年

己未以後衣食奔走與德尹出入如相避庚午偪
臘歸自具區德尹適從洛中旋里除夕酌酒相勞
益十二年無此樂矣爰相約為杜門計盡辛未一
年凡得詩如干首

元夕同顧伊人張昆詒集徐敬思宅分得燈字
自到君家飲量增也教小戶罄三升笙歌院隔新翻曲
書畫屏開巧樣燈知有清光終讓月可無佳句冷如水
誇張節物誠多事誰似詩人范致能

范石湖有上元紀
吳下節物三十二

崑山一名玉峰周圍二里許似累石而成者唐
 張祐孟郊有詩與蓋嶼所畫山圖同留慧聚寺
 中向有石刻宋皇祐中王半山以舒州倅至縣
 相水利登山閱二公詩次韻和之時稱四絕淳
 熙中寺燬於火自唐以來名流題咏及楊惠之
 所塑毗沙門天王像或云張愛兒所作李後主所書榜
 額一掃無餘今准提閣壁間石刻三公詩乃後
 人補刻非故物也正月十六日同張昆詒盧素
 公登山感懷往蹟為詳考本末并系以詩

吳中園圃愛假山家家畫藁撫荆關此山本真翻似假

怪石疊起孤城間，竒峯尤在西南頰。
縹緲玲瓏還戍削，遊人仰視一綫天。
信有孤雲生兩角，幾輩留題盛昔賢。
曾聞摹勒載名篇，崑岡烈火精藍盡。
何物能爲金石堅，人間假合夫何有。
差是令名堪不朽，我詩寫意直取真。
啗點還須防衆口。

德尹四十初度二首同潤木作

四十平頭齒未頽，誰教辛苦逐風埃。
祝君此日無多語

正要飛騰暮景來

少陵詩四十明朝
過飛騰暮景斜

蒲柳桑榆各老成，一杯相屬話生平。
十年多少回頭事

我是蘇家白髮兄

用東坡壽子
由詩中語

題又微姪投壺圖小照

五經一笥咲老韶長眷侍兒如許嬌卷衣風裏聽傳箭
近前爭賭蓮花驍

初夏園居十二絕句

人言瘦地差宜竹隣舍曾分一本栽尺八梢溝攔不斷
狂鞭攙過菜畦來

牡丹不稱種村莊開到春殘盡野芳楸棘補籬成片段
丁香香過木香香

亭臺廢後變溝塍欲置茅齋力未能大抵爲園多借景
別家高樹挂朱藤

方池一畝萍初合四月中旬未有蛙簇簇銀針齊上水
綠楊影動散魚花

莎軟鋪茵纔沒膝樹圓擁繖正遮頭如花流過碧池去

忽聽一聲黃栗留

詩疏黃鳥黃鸝留也或謂之黃栗留

長年因病醫方熟小草隨時藥料增趁取連朝好風日

帶花收晒鷺絲藤

閏年留竹苦防蠹辰日種瓜須早澆愛花更作晚秋計

老瓦盆邊分菊苗

鷲粟着子米囊小蠶豆褪花皂莢成莫欺老圃不工畫

小碎詩篇如寫生

去秋梧子收不盡旋向根邊兩葉生保得主人長閉戶

四三年便看陰成

自蟠老榦自抽條長養仙家枸杞苗不似苔華難獨立

附他喬木號凌霄

鳴聲上下羽交交雀穀初安樹一梢啼殺斑鳩生計拙
將雛時節定爭巢

頭眠已過二眠新蠶候叅差雜四隣一月往來渾斷絕
隔籬時見采桑人

橘薪

生意千頭盡園租五畝荒子孫貧敢計奴婢價誰償入
室鉤衣破爲薪刺眼傷更愁秋冷澹屋角少青黃

新竹

插槿三年與作樊又添客土護深根主人愛竹老成癖

看筍出林如子孫

二月得長孫名
興祖故及之

布幔和德尹二首

細竹輕竿稍出檐
空庭得蔭比松杉
賽他畫舫齋中臥
平展江心一面帆

背日開簾更覺涼
午陰屋角漏微光
呼兒勤掃蜘蛛網
方便花時蝶過墻

梅雨連旬河流暴漲
偶同德尹泛村船
入菖蒲港

雨急溝渠漲怒生
再添一尺與橋平
無端驚起江湖夢
聽作船頭放楫聲

雨後

便從一雨望豐年
大抵人情慰目前
我比老農還計短

只貪今夜夜涼眠

衰至

中年事事防衰至不獨侵尋感歲華
誤去黑鬚因鑷白旋揩昏眼又生花
頽唐老境詩無格汗漫遊踪累有家
合是歸時歸亦得趁收麥豆種胡麻

庭前草花與德尹分韻四首

輕刀勻剪翠葱蘢別圃移來土最鬆
累爾纏絲附枯竹屋低庭小不栽松

女蘿

小兒稱長老稱翁比似花冠約略同
消得閒人閒處看

可憐小草亦爭雄

雞冠

群群紅白隔窗紗
么鳳飛來骨鬢鴉
老眼自看還自咲

種花猶種女兒花

鳳仙

位置瓷盆手自親
者風香透色如銀
蹙歸我已家如客

還與南花作主人

茉莉張叔敏呼為遠客范石湖詩南花宜夏不禁涼

夢中得絕句似小遊仙詩醒而錄之

東海東頭拾火珠
抱來徑寸豈論銖
兒童莫逐黃金彈
咲向扶桑打赤烏

舟曉次德尹韻二首

螢尾孤光合復開
灣頭風急却飛回
菰蒲深處一枝櫓
搖入漁人夢裏來

狂蛙鬧雨群千百
遠火疑星點兩三
忽聽雞鳴鐘渡水
有人家處有茅菴

次韵荅陸柱瀾見訪

旅塵狂走十年餘，每到還家歎瑟居。
髮變一頭俄向老，草荒三徑只如初。
傷心短蘧經時泪，外舅射山先生已下世覆手
貧交屈指踈多謝，新詩猶念舊可能。
懷抱對君抒

程西村以如圃詩索和次原韵

人境何曾礙結廬，一椽朴茂似園居。
勸荒自作披榛賦，得法新傳種樹書。
老圃閒談真可聽，比隣初約莫教虛。
笑他亭館多何益，無福能消鼠壤蔬。

七夕同德尹潤木作禁用故實

眼中七度如梳月，又帶桐陰入小樓。
懊恼一天星似火，閏年今夕未交秋。

茨菰見唐人詩如白香山云渠荒新葉長慈姑
朱放云茨菰葉爛別西灣劉夢得云菰葉風開
綠剪刀未有及其花者余盆池偶種一窠立秋
後忽發細莖每節叢生花開純白色如玉蝶梅
差小頗有清香因作一首以補詩家之缺

舊葉復新葉碧莖忽抽芽誰將綠剪刀剪出白玉花水
邊有秋意涼蝶來西家

惠研谿庶常從京邸寄到吳超士見懷詩四章

次韻奉酬並簡研谿

故人隔座呼同舍花底移樽醉小樓

余初識超士於研谿館舍

散作

兩萍漂水面遠煩尺鯉到沙頭狂名自悔迩難穩歸志

差堅挽不留一窖黃塵殘夢外爲君牽動十年愁

飄瓦虛舟豈有因誰當入爨惜勞薪潛形那避含沙射

沈璧何來按劍嗔

來詩言及已巳秋飲酒得罪事故云

桂樹叢荒招隱伴

楊花風墮倦遊人白衣蒼狗須臾事醉眼看來分外新

黃羊枰上守枯碁訝許人間獨亢眉一戒早開元亮酒

半年遲荅暢當詩迴腸徑路梯空險徹骨冰霜造物慈

羸對村童開口笑竿頭新作釣漁師

臥聽門前剝啄聲書來猶勸束裝行貧逢閏歲增薪米

病過新秋減送迎涼雨半窗初到竹碧尊千里正宜羹

也應世味多忘却除是難忘故舊情

種菊詩示克建克承兩兒時余將往湓城

擾擾十三載孤蹤混泥沙及歸翻苦閒何以銷年華種
菊亦偶爾惜此徑寸芽春苗不分栽秋至焉得花
惡草既親鋤清泉亦手灌却將四體勤覬博兩目翫舍
之忽將去咲別東籬伴根是老人培花從汝曹看

夜初涼

人靜覺夜涼書帷傷清越不忍陷秋蟲吹燈還就月

湓城之遊未果作詩示德尹兼荅朱恒齋太守
貧賤胡可居無端兩憔悴侵尋歎末路鹵莽悔初志豈
無骨肉恩聚少別苦易分馳十年外廬舍任榛刺殘冬
偶同歸草草如旅次杜門得半載村巷傳異事不知相
見驩中有思親淚兩檐猶在堂牛眠指何地堪輿及日

相時俗多拘忌吾寧葬吾親忍規子孫計所嗟藉物力
動輒故人累潯陽賢使君清俸煩遠致有生迫孤露久
矣衆所棄誰能念窮交尚舉麥舟義當之恐過分一感
再三媿佳招况踰期恒齋來札約余季夏至潯城欲往未得遂我貧
荷見諒應并諒此意鴻雁滿江湖詩成特先寄

題馬漁村行路難小影

狂瀾打頭山壓面跼蹐乾坤縈一綫我行畏路知路難
談虎還防君色變君家門前池水清對門山與樓簷平
此中徑路坦於掌作底胸次添崢嶸畫師寫圖如有託
洗耳聽琴差不惡可憐冰雪七條絃千萬勿彈塘捕蟬

送楊次也入都並簡尊甫太史公三首

八座重親未白頭角巾里第最風流孫枝本是階庭秀
擊悅看他又出遊

石渠天祿近何如欲讀應無未見書用黃香傳中語但約南船

多載酒對難官燭看銀魚時端木嫂夫人亦北上故及之

交情到爾凡三世得路憐余共一心重向別中留望眼
別愁終淺望終深

竹溪書屋爲又微聲山兩姪賦三首

竹栢陰交槐柳陰踈籬一帶棘除針自從新改橋邊路
大費花時曲折尋

記得當時卅角遊書聲愛聽出林丘兩家前輩多凋謝

又對兒孫感白頭石丈兄與先君子情好最密每過裕菴余兄弟未嘗不隨行也

夕火晨香共一龕閒隨清磬出花南居人盡識藏書處

碧蘚蒼藤白石菴

用李公擇事

沈稼村太史招飲耿巖草堂

十里秋光雨洗新稻花香路淨無塵門依曲沼難通櫂
居近東家愛得隣却對杯棹寬禮數每聽談論長精神
回看宦海波濤濶轉羨收帆到岸人

壚墟舟中口占同德尹作二首

水面浮漚的的圓采菱歌出采蓮船此歌賴是吳兒唱
若是吳孃更可憐

樹低草沒一叢叢曉日橫生白蕩風拍岸水痕高一尺
布帆抄路稻田中

膠城孫愷似編修欲行善於其鄉竟遭吏議今
方罷官就訊吳中相遇感憤成詩

蒼狗如雲極可哀危機翻自 詔恩來家承忠孝身尤
重禍起衣冠勢易摧善不可爲寧論惡人皆欲殺我憐
才乾坤直似蝸廬窄懷抱除非醉始開

胥門曉發

月落日未升大星明一箇舟人貪早起客子便晨臥忽
聞水氣腥知有漁榔過

長水塘夜泊

高埭接長橋橋形落鰓竦市喧夜微息犬吠舡猶動可
憐一川月細碎如潑永忍負好秋光推篷兀殘夢

庭桂初開隣人有來乞花者

吳閫十日遊歸權及秋仲入門視庭桂破蕾暗香動常
時花最早七夕露華重苦怪今年遲曾經上年凍西風
不吾私吹散香滿街頗有好事翁叩戶乞清供披衣揖
使入手折寧煩送譬如此根株本自隣家種我生無長
物有者皆可共配花稱主人毋乃被嘲弄

豆棚爲風雨所壞

平生乏鮮肥肉食非所慕偶然營口腹蓄念計必誤春
種瓜豆苗愛養以孩孺插竹就茆檐縛繩使之固初看
弱蔓引漸喜衆葉布絲瓜夏蚤結落蒂甘於瓠菹豆開
獨遲白花待秋露及茲綠垂莢採摘在晨暮夜來風雨

狂傾倒莫支柱老饕自安分物理庶可悟托名得蛾眉

本草白菹豆
一名蛾眉豆吁嗟難免妬

題高錫純羽士畫像

猛虎入群牙爪悍衆蛇齧索懸石斷平生却咲費長房
學道工夫纔及半葛陂拄杖辭壺公隨身霹靂搜蛟龍
道人有道兀不動心在一輪圓鏡中

後又題云圓月當空
光生何處撥開

雲霧請
師全露

八月十五夜與德尹桂庭對酌三首

半年門徑草芊眠除草開場爲月圓月正當頭花照眼
此花原是月中仙

昨日方愁雨打扉夜來不料有清輝可憐萬事盡如此

居者別家行者歸

時潤木獨
留邑中

看來南北東西月只與今宵一樣圓
却對團圓感離別
人生能幾十三年

東田看稻

雲氣散如濤
秋田罷桔槔
漲痕侵岸濶
稗草比禾高
米卜豐年賤
農憐瘠土勞
預期營一醉
歸去滌新槽

沈孟澤索題小照二首

桐陰寬罩一方苔
流水聲中洗耳來
若是補圖須補竹
琴材已具少簫材

神理真傳老畫師
毫端躍躍動須眉
人間別有膏肓病

看取先生袖手時

沈精
于醫

聞村家打稻聲

鵲豆籬邊捫腹行情游筋力負歸耕自慙飽喫豐年飯
閒聽隣家打稻聲

九日寄諸弟湖上

如此秋光悵不同湖天無雨又無風白蘋未改空洲綠
烏柏長先萬木紅好事誰還能送酒浪遊吾轉悔飄蓬
兩峯緣淺登高會懶到今年似蟄蟲

重陽後二日雨霽行園

兩尖家門山登陟昨乃阻曉晴已過節興盡力難努我
衰万事廢所樂在蔬圃早菘種旬日行列紛可數蟲來
蝕其苗饕饕猛於虎一寒爲掃除正賴夜來雨宿根發

餘潤新葉換翠羽池西木芙蓉紅白相媚嫵下有二寸
魚花影嚼復吐何來兩鵝鵲雙翅勇自鼓公然啣魚去
飽食不避主可憐病橘林凍裂上年土坐視千緡荒官
稅私莫補天心有傾覆肯諒貧家苦物理苟不齊吾寧
守終窶

鞭筍

雨後竹走鞭冷鴉瘦相引小僮揆土裂劔取如拾菌烹
之媚盤餐下箸吾未忍寸鞭何足惜惜者來年筍

收芋

芋肥莖葉長芋瘦莖葉短率以鹵莽報吾願良易滿年
豐百物登磊落光堆盤其魁蹲如鴟小亦伏殼卵

立冬

節候攬暮秋初陰猶未壯南檐白日影入室已一丈門
簾布差密窗紙油逾亮坐看佛前香無風烟縷上頻年
遠行役浮氣逐塵埃裘茸插兩手故與嚴威抗如今矮
屋中尚欲設屏障寧非老將至嗜好改前尚興到聊復
吟都忘往來相

落葉詩五首和趙漁玉范用賓

靜中初有聲策策起林薄俄聞響簷瓦急點疑雨作開
門日滿庭始悟風隕籜徐行踏殘葉仰見巢枝鵲鵲噪
一何喜鴉鳴一何惡客緒本無端誰禁對搖落

好景忽潛移丹黃換青綠丹黃亦隨盡假以絢吾目失

蔭無密林蔀家有豐屋嚴霜挾時令顛顚非一族何殊
百萬師委甲填坑谷

摧壞寧自主出林竟如狂初來聚堆阜倏忽還飛揚不
妨穿我籬慎莫打我窗籬穿可徐補窗破風滿牀
春花得人憐飄蕩尚苦遽天公肯汝惜狼籍等敗絮從
來擇庇群多在成蹊處君看西家葉又過東家去
荒居環雜木最怕冬來風如駕一芥舟震撼驚濤中幸
賴杜陵老前月已耳聾人生有聞見榮悴方無窮

欲遊雲岫不果戲示德尹

吾鄉鷹窠頂陡起東海邊飛鳥到山止東南水浮天常
聞十月交登臨得竒觀天文直角氏日月行同躔憑高

觀倒景長在寅卯間初生兆一魄摩盪蛟龍淵須臾一
綫紅迸出白玉盤晝然劈作兩對射光相穿白者忽潛
形孤輪躍紅丸是名爲合璧故事山僧傳山僧老白頭
歲歲居山巔目擊凡幾箇流傳徧人寰嗟我與吾子好
竒結前緣足跡半九州所到窮山川如何名勝地近失
耳目前昨聞大阮介菴語便思陟巒岼朝來復逡巡相
對亦可憐勝遊無近遠人苦不得閒旣閒或少伴得伴
長無錢乃知意興豪必及少壯年一慵百事廢豈獨登
山然

題曹希文祓蘭圖

噴水澆花曉尚寒試憑纖手摘來看神仙舊是瑤臺伴

再到人間合夢蘭

後落葉詩三首

衆葉四散飛，寧飈亦暫停。枯叢刺數點，有如塊粘萍。又
如將曙天，尚帶三五星。鳥雀聚疎影，夕陽到空亭。時還
墮一片，夢化蘧蘧形。

向榮旣欣欣，黃落亦槭槭。却將傍觀意，爲爾生分別。何
如兩相忘，造化本無迹。山僧撥葉至，或嫌門徑窄。吾嬾
不出門，門前任堆積。

我吟落葉詩，如與落葉語。年年走關塞，搖蕩愁見汝。馬
頭聲蕭蕭，打面風帶雨。吳霜點兩鬢，歸作故林主。故林
豈無春，過眼同逆旅。後時感獨立，孰是歲寒侶。

題高江村先生泛槎圖小影次韵

葛陂龍化杖如仙欲捲銀河瀉作泉除是先生能鎮定
波濤人海正粘天

雪中吕山劉見過

去年別君處吳中正連陰雪花大如席開船太湖心今
年君過我海天又寒凝去聲輕冰觸篙破清脆聲可聽一

年復一年能禁幾回老與君迫暮景爲別常恨早我有
一斗酒可以禦北風酒熟挽不畱問胡太匆匆君言既
相見興盡我當去正如上番來彼此兩不遇去冬山劉過里中余

留洞庭未返

曹希文以端硯詩四章索和即疊原韵

溪光如眼綠潭潭洗髓何辭一再三碧落數星瞻夜斗

冰綃半尺剪春蠶拌分琥珀知難並匣配琉璃定不慙

三十六鱗煩寄取好磨濃墨寫雲藍

用段柯古詩中事

紫雲一角割天南秀色猶看帶嶺嵐東峽波濤時一湧

濕毫風雨潤長含來疑甃社光吞月去恐延津勢躍鐔

神物自來須善保有求容易遂虞曇

時有欲得宋齋執法硯者故及之

巖洞烟霞笑未揮欲隨翡翠竟巢南筆因興到詩情淡

嗜與年深石性諳圭璧方圓形總肖龍蛇蟠攫力誰堪

兩都賓主如相見淬瑩才鋒出健談

雅好雖多不厭貪眼中似爾亦竒憨一生自許癡無偶

兩手從誇硯必三

古人以貪多者爲兩手三硯希文蓄石最富故云

俗論掃空

和氏癖癖香爭識米家菴新宮銘草誰先就仙掌摩挲
與細探

食齋

朝來食指無端動走覓隣園又一竒薄雪乍消青冑土
滿籃香齋未花時

冬夜宿古衡山先奉政公祠下感賦

路滑冰堅賴短筇到來支枕榻纔容透窗燭影寒於月
拏雪松枝健比龍老屋將傾傷世澤墓田久廢媿春農
十年塵夢憑呼覺金粟山頭一杵鐘

除夕示德尹潤木信菴四首

前夜雷霆了不驚

三日前
大雷電

靜中擾擾惜羣生一村野犬

多狂走多事隣家爆竹聲

山妻椎髻子頭蓬布褐隨宜稱老翁特與孫雛破年例
抱來膝上換青紅

從前筆墨粗償債削藁存來得幾何剛是今年無可汰
應酬詩少唱酬多

村巷無雞漏板遲漫漫長夜夜何其野人預辦朝眠熟

怕作新年日蝕詩

明年元旦日食

敬業堂詩集卷十三

敬業堂詩集卷十四

海寧 查慎行 悔餘

湓城集

起壬申正月盡七月

庚午春朱恒齋由刑部郎出守九江枉書見招踰
年始往踐約既為輯廬山志復遂廬山之游賢地
主之貺我良厚矣

禾中與德尹別

四海皆兄弟何人似卯君也知年向老不合手頻分夜
夢留殘月春帆感斷雲得歸吾早決負土共成墳

時方計先

人墓事

吳江留別張弘濂庶常

南風激船如釋箭片帆曉發平湖縣百六十里半日程
第四橋邊一相見開懷各話別中事蒼狗浮雲凡幾變
三年善病君差強君但憂貧不憂賤我今落魄仍江湖
明朝又欲西辭吳酌君之酒與君別楊花拂頭髮雙雪
夾浦橋阻風
夾浦橋南客棹孤雨聲連夜洗平蕪東風吹淺吳江水
半作春潮漲太湖

山塘晚霽

最好停橈近酒家放晴天氣日初斜盆梅謝後蘭芽茁
正月蜂聲未鬧花

曉渡西沈回望宜興縣郭

櫓聲西入蝦籠嘴波面微微過沈風濃日吐烟烟吐樹

浮圖一角是城東

蝦籠嘴西沈港名

高淳

縣小無城郭橋長即水門魚蝦鯉作市鵝鴨鬧如村曲
曲橋隨岸叢叢柳抱園漸知江路近盈縮視潮痕

渡蕪湖關

兩槳前頭水勢寬曉風吹得敝裘寒漸空杼軸憐民困
老閱波濤信路難此去吾師聊作伴從來灑吏必嘲官

時官勸為津吏所阻

為未夏秋間與先兄蕭荒同遊地也篋中一卷彈箏集忍對江山制泪看

自此西上皆已

荻港人家杏花

輕舸細雨江村路過眼東風見杏花略似小車逢綺陌
不知紅艷屬誰家

雨中過銅陵

沙尾沿流曲作堤青山一半吐城低洲空亂雁爭歸北
路轉千帆盡向西正剪渡時風乍漲最含烟處柳初齊
客程已厭連朝雨不要春鳩更苦啼

雨後望九華山

橫看不與側看同九朶芙蓉並插空去鳥已衝殘雨沒
歸雲忽漏夕陽紅劈開華掌層層翠使盡湘帆面面風
終是詩人言語大携來直欲置壺中

東坡名仇池石
為壺中九華

荷葉洲對雪

在大通
對岸

梅根浦口風尤緊荷葉洲前雪正濃兩岸曉雲深似墨

一條春水健如龍

唐羅隱曾卜居九華山下梅根浦按圖經江水歷李陽河經梅根口銅陵

縣今大通有水自九華山麓出江即此也

雪晴池陽舟中

曉行池陽路霽景豁清美江南江北山照影同一水半
銜殘雪白半插斷霞紫眼前有奇句只在空濛裏我嬾
吟未成風吹櫂歌起

大風至劉婆磯

江豚忽掉頭微動青玻璃俄看黑雲起遙指天南隄須
臆隊我前橫截江兩涯拔江噴作雨白日潛光輝初疑
鰲山傾又若鱷窟移舉舟向空擲綆斷誰能縻長年束

手嘆有力不得施而我于中流高枕故咏詩明知怖無
益聊復忍少時男兒可憐蟲造物終見慈旣濟乃思痛
嗒焉中心脾投文訴江神略陳危苦辭水從西南來風
亦西南吹誰歟激使怒若是不可磯自我涉江湖十三
年于茲南浮及北渡履險間有之此胡太酷烈性命輕
嶮巖仕宦涉江來揚帆若揚髻船尾點畫鼓船頭插黃
旗大賈涉江來滿載居羸竒放溜如放馬控縱從人馳
我舩何所載載書載鴟夷壓浪一葉輕疾行固其宜如
何強弓彎寸進恒苦遲神于我乎薄厚彼寧獨私咄哉
窮旅人初受俗眼唾擲掄到五鬼漸漸伺路岐惟神實
正直倚賴相扶持今朝大戲劇漂泊將誰依禱罷似有

感撫枕魂依稀神來入我夢責我大有詞風水渙成文
變化豈汝知滔天初濫觴至險出坦迤汝以耳目料何
異握管窺汝又好遠遊遠遊計終癡萬里走從軍還家
仍布衣十年就場屋逐衆趨京師人皆取魏科三黜名
獨遺謂宜自揣量息影甘荆扉茲來非宦遊又非競刀
錐皇皇義奚取放浪形骸為汝居頗有園園中頗有池
好風皺池面浮花舞漣漪此豈有驚波來溷汝息機汝
自捨之出去安而即危不聞南山隄下有季女饑不見
東海畔中有踏浪兒兩者聽自取決擇休然疑叩頭謝
江神痼疾神所治大夢喚初覺行當早旋歸

題樅陽旅壁

噩夢驚回路已賒
舸艚船上櫓伊鴉
青山繞屋無修竹

山皆頑石不產竹
紅袖當壚有杏花
野渡漸生沿岸火
春流未

沒去年沙綠楊影裏
初弦月人隔烟江
正望家

田間先生聞余至自青山命駕來會喜賦

春風弭楫向樅陽
舊約多年不敢忘
先生在都下送余南歸詩有秋到皖

江尋舊好可能一問白頭來之句
四海平交無行輩
兩朝軼事在文章

從知老境難為客
誰與先生特置鄉
一片青山高插漢

歸然真似魯靈光

花朝晴示僧道楷

初日烘雲碎作霞
討春人競出江涯
老來不喜閒桃李

別約山僧看菜花

自樅陽至楊樹灣道中即目

併日春光鬪物華馬頭胡蝶太天斜誰知駭綠紛紅候

還有春風未放花

義津橋外見碧桃
一樹猶未放花

三角潭

春禽交交鳴綠楊征夫辨色早束裝前行十里霧未醒
驢尾秃速驢耳長朦朧人語遙喚渡約略村落開微陽
烟光兩岸溪一曲樹影四匝潭中央菜畦麥隴桃李徑
高間紅白低青黃新鵝野鴨好毛羽拍拍飛出沿方塘
田家之樂樂何限頓令過客忘他鄉只愁霧重天欲雨
橫策又上黃茅岡

桐城謁左忠毅公祠

祠在縣治
東數十步

歷歷三朝事他時髮指冠賢人當橫決國勢必摧殘
俎豆新楹肅乾坤正氣完如何鄉後輩偏有孔都官

謂懷寧也

過田間先生山居相留信宿出示藏山集再賦

二詩博和

層巒俯瞰萬松梢中有高人舊結茅自入鹿門詩一變
竟馴龍性易初爻雲盤遠勢鴉翻陣花作新泥燕補巢
未免累翁雞黍約往還原不拒貧交

比似仙源那易尋避人畢竟要山深誰教鶴怨猿啼客
來聽鸞歌鳳舞音語雜談諧皆典故老傳著述豈初心
好看龍馬精神健東武時為抱膝吟

三江口苦雨

那利磯頭雨殺風千檣烟氣濕濛濛楚天低壓平蕪外
何處青山認皖公

大雪渡馬當

臥看穿雲日色黃起聞鯨吼北風狂新詩也得江神助
雪打春帆渡馬當

順風揚帆時閉目靜聽如空山梵唄殊有會心
破浪風前萬鼓鳴喧囂原向靜中生無心只作深山聽
一樹松濤起梵聲

與九江太守朱恒齋

一麾暫出領名邦九疊屏山九派江正喜為郎猶未老
早聞治行已無雙謳歌滿境鶉音革軒冕巡城帟氣降

時有虎至郊外君移
文城隍神一發殪之
依舊官居精典籍只多鈴卒晝敲

二虎歌 并序

壬申正月有兩虎闌入九江西門外龍開河傷一人

已而逸去市人惴惴恐其復至朱恒齋太守齋戒為

責躬文翌日大會屬員於城隍廟 即漢將軍灌嬰 及宋大夫

祠下 漢九江守宋均 既焚牒告神則命虞人挾弓矢火器窮

追之期于必獲越五日殪其一至是盡殲焉黃質黑

章猙獰可怖聚而觀者數千人咸謂使君至誠感神

能力除民害也適余至九江目覩其事作歌以俟采

風者

湓城連山猛獸多兩虎突入龍開河腥風悵悵日杲杲
白晝市上無人過使君視民如赤子威鳳生儀麟有趾
豪強斂戢盜賊清爾獨何為至於此灌將軍廟宋公祠
能捍大患則祀之撞鐘伐鼓會僚佐第一先焚責已辭
與神後先俱守土政拙慚余不如古愛其父祖及子孫
忍畀孱人飽虓虎明朝大獵城南闈毛風血雨迷荆榛
特開一面縱雉兔死不當罪傷吾仁須臾虎自林中出
小者先擒大者逸雖擒一虎戕一人其勢公然兩相敵
此時伐罪更有名合圍再往大掩群潮州鱷魚必盡殺
不信請讀昌黎文虞人眼疾如鷲鳥餘勇登崖鬪牙爪
咆哮一聲山忽裂火箭飛空碎其腦黑章黃質毛斑斑

旗杠壓肩奏凱還猶防作力斷急縛血色併出雙睛間
道傍觀者爭太息自古神功扶正直百年兇暴一朝除
此事知公有陰德江邊戶戶皆椎牛從此山無樵采憂
詩成大咲冠纓絕我正欲作匡廬遊

廬山之遊未果呂灌園有詩索和

峩峩拍雲峯拔地幾千丈仙靈晦高跡元氣棲蒼莽朝
來雲抹腰露頂氣一爽蓮花本無蒂蒸出仙人掌拂鏡
眼雙明挾烟鳥孤往勿嗟遊未到遐矚寓心賞但恐身
入山依然結塵想

西門之役旣連斃二虎矣後五日復獲虎子二
呂灌園作後二虎歌再次其韻

虞人入山官吏賀擣穴成擒無小大盡將醜類肆市朝
不許兇雛草間臥去如烈火歸如風覆巢破卵五日中
獻肩獻縱來接武貫蝨精神用強弩擔頭縛作春筍斑
一一竒毛入官府餘威假托雖有徒不聞王政寬無辜
賊吾民者殺無赦別有淵藪容逃逋弱食頗分強者肉
倚伏機難論禍福春行秋令公所憐陰雨隨車洗餘毒
是日大雨以寬濟猛在酌宜潁川有鳳方來儀殺胎豈惟禁
獵戶竭澤兼欲防漁師庶幾百物稱蕃息童子仁心使
君德我爲此語非養奸若是兇豪須斂跡

楊花同恒齋賦

散作輕埃滾作團不成花片但漫漫春如短夢初離影

人在東風正倚欄
微雨乍粘還有態
柔條欲戀已無端
祇應老眼憐輕薄
長自摩挲霧裏看

初聞黃鸝次灌園韻

一聲流過小窻前
去國關心又一年
圓入客吟同宛轉
熟聞鄉語倍纏絲
畫樓脉脉通春夢
碧樹茸茸冪曉烟
爲是好音須愛惜
自憐終勝受人憐

同呂灌園鄒仙來諸君遊甘棠湖登烟水亭次
壁間舊韻

長烟濛濛春澹澹
草色波光晴颭艷
廬山翠掃兩角雲
倒瀉杯中青一片
舊開小閣壓紋縠
時見飛帆掣流電
背部人如燕雀稀
點沙舟與鳧鷖亂
地偏絲管曲嘈雜

市遠塵囂風截斷可憐俗眼競喧湫誰肯清遊期汗漫
同時數子興不淺佳句澄鮮分謝練莫辭勝境日日往
預恐萍跡紛紛散何當春酒變成湖醉過鶯花三月半

東坡送劉景文詩云春酒一變甘棠湖自
注云景文卜居九江近甘棠湖即此地

琵琶亭次宋郭明復舊韻

春江帶城沙嘴白弓勢彎環抱新月我來縱棹半日遊
敗意眼前無一物吟詩直入老僧家小技忽癢難搔爬
分明有句和不得古調豈叶箏琵琶先生不作誰與語
白日茫茫變風雨男兒失路雖可憐何至紅顏相爾汝
與公相去又千年依舊荒城無管絃掃空題壁孤亭在
咲拍門前浪拍天

江州雜咏四首

依舊江關俯麗譙，居人指點說天橋。
明太祖破江州事 戰迴左

蠡軍容壯鑿斷殘岡，霸氣銷。
東門外有天子堂，相傳劉誠意惡陳友諒，都此得勝。

地故鑿之 鎮將南朝偏跋扈，部兵西楚最輕剽。
指左良玉袁繼咸事 自

從血洗孤城後，九派空回寂莫潮。

天文容易掃欃槍，隣郡猶傳戍鼓鳴。
戊辰夏楚盜破武昌黃州 鴉鵲

自朝英布廟，
北門外九江王廟至今血食 魚龍曾擾灌嬰城，紛紛設

險寧論地，往往時危獨被兵。
按史自北宋以來凡四屠城 四十三年

休養力不知，何福享承平。

峭削峯巒北，面當雲頭一半割。南康高僧舊入遺，民社

世業誰留佚老堂。三劫烽烟埋洞壑，百年文物遞滄桑。

名山志在真難續或有竒蹤隨渺茫

時余方輯廬山志

別開官署射亭傍一角頽城壓短墻螺髻浮青虛劔匣

府署正對雙劔峯宋乾道中蜀人唐立方雉媒平綠展闢地作二城轟樓其上謂之劔匣見程史

球場舩稀小步初移市客上高樓必望鄉

樂天詩三百年來庾樓上

曾經多少望鄉人庾樓直府署北

添得黃蘆侵岸濶舊遊回首獨神傷

余已未壬戌兩經此郡

余作江州雜詩灌園既垂和續為潯陽行感慨

淋漓讀之使我心惻因推本其意再成長律四

十韻首言風土次序東晉以後迨明初一一竊

據事終於寧南乙酉之禍此州被亂情形始末

略備休養生聚其在斯時乎並邀恒齋太守同

賦

鼓角悲涼地山川要害城一州當孔道萬里控江程近

楚風猶悍吞吳氣未平鳧鷖飛易散魚鮪竄多驚戶少

移恒業田饒廢力畊兒童知矢石婦女識旗旌不諒流

離苦翻疑性命輕舊文徵史冊殘局愴棋枰置郡名長

易秦為九江郡漢屬吳國三國初屬武昌後置潯陽郡

晉改江州梁移九江治湓城唐宋為江州建炎後陞

定江軍元置江州封王面或黥謂英大都當用武未有

不稱兵建業朝廷小潯陽肘腋并中原方轉鬪南服暫

維寧草草圖王計寥寥伐叛聲奸雄雖反覆使相必忠

貞間倚屏藩重頻扶鼎鼐傾晉永昌中陶侃領江州平

潯陽趨建業斬蘇峻隆安中劉毅何無忌輩敗桓玄于

崢嶸洲梁承聖中陳霸先以江州刺史定侯景之亂

艱虞經剝運成敗付閒評是物關天授伊誰敢力爭每

聞稱僭竊旋見就擒烹宋泰始元徽中晉安王子勳桂陽王休範梁天監中刺史陳伯

之俱以江州反未幾就平南宋建炎中李成陷江州為張峻岳飛所敗元至正二十年陳友諒以江州為都國

號漢改元大義尋戰死昨者民何罪今來憤尚盈以下專指左良玉屠城事勤

王須奉檄犯闕爾無名灞上隨兒戲河中咲客迎崇禎甲申

良玉避流賊鋒欲遁九江遊擊胡以寧鈞致之往關廂一年已而返武昌至乙酉春監軍御史黃澍偽藏太子

詔召良玉入攻馬士英良玉信之將軍停鎧仗辨士絕

冠纓柳敬亭為良玉幕容事具吳梅村集勿戢兵猶火搜牢地盡阮初良玉發

武昌挾楚督袁繼咸以往至是與繼咸標將郝二連營九江城外四月初四日遂縱兵焚掠殺男女二十餘萬

摧殘鋒太酷屠戮禍交櫻漂血長溝赤燒空烈焰晴押

網連萬艦宋曹翰屠江州取廬山東林鐵羅漢五百歸潁州調巨艦滿載金帛時號押網羅漢捲

甲拔諸營作俑歸曹翰

江州屠城自翰始前此未有也

貪狼甚李成

宋即

建炎中反賊

天誅旋幸伏

兵發九江良玉以氣塞死舟中

殺氣驟難清落籍

銷灰劫招魂異死生若非敷大澤何以起疲氓牙蘖枝

初發勾尖草乍萌及時資愛養太守賴廉明冷署依雙

劍

峯名

顏垣寄一楹涉園除瓦礫課僕種蕪菁耗折空餅

粟支吾折脚鐺官貧仍逆旅吏隱亦柴荆曉雨排衙坐

春田露冕行設施看次第氣象卜豐亨蟋蟀還農俗琵

琶遣宦情篇成聊紀實大雅待君賡

石鐘山

鄱陽吞天來噴薄南出口江流不能敵抵北乃東走懸

崖峙西灣水勢掃如帚孤城良其背外捍賴兩肘靈區

聚神奸石狀雜妍醜平鋪理橫截旁罅中劈剖熊羆饑
攫人竒鬼起援手蜂窠掛篙眼鳥卵破甕缶一一皆下
垂中空無一有有時應鞞鞞照影見星斗忽然風喧逐
聲作蒲牢吼年深追蠹壞兼恐石斷紐惜哉坡公記石
刻泐已久蘇公石鐘山記舊刻于南鐘石上明正統已巳石裂仆於水今失其處矣茫茫宇
宙間孰是真不朽

月夜自湖口泛舟還湓城同恒齋太守賦

空江夜東注月光似俱流舉頭看青天水去月自留移
帆忽西向月又隨我舟而月豈有心適與吾目謀澄觀
得靜趣含景無停休不辭川路長獲此清夜遊遠樹小
池口孤鐘鎖江樓須臾燈燭光候騎迎沙頭誰知太守

樂夢亦同鳧鷗

春晴曲效溫飛卿體

朝陽透簷鵲聲喜烟外遊絲風綽起馬拂花髮驕欲嘶
招招酒旆垂楊裏蕉衫筍屐稀出城上樓曉看南山晴
平春遠綠望不到一幅錦機新織成江聲剪斷尋芳徑
九派澄光鑄明鏡柳花散作千點萍日夜東流知水性
三月十七夜與恒齋月下論詩

庾公樓外月飛光上雲崖此時兩相對此景良自佳我
挾山野性尋君到衙齋不棄貧賤交酬唱晨夕偕脫畧
分雖忘終不雜恢諧所商在文字虛受非擊排縱論古
與今瀉胸走江淮力欲追正始旁喧厭淫哇向來風騷

流汎濫無津涯可傳必有故長松出樊柴明明正變途
花葉殊根菱須求作者意勿使本分垂新詩壓時賢高
朗洵少儕當與古爭勝拾級已得階人言簿書煩正坐
乏雅懷君懷皎如月塵霧其能埋

魚苗舩

幾片紅旗報販鮮魚苗百斛楚人舩憐他性命如針細
也與官家辦稅錢

曉晴咏恒齋庭下芭蕉

放晴天色愛清朝間赴風前翠袖招忽見主人窻下綠

始知夜雨為芭蕉

杜牧詩主人
窻外有芭蕉

九江向無鱒魚網戶忽獲一尾以饋太守晚餐

分噉作三絕句

鮠魚子鱗賤如毛何物能令市價高
從此溢城添水產
白頭春浪出銀刀

四月家鄉記飽餐朝來拍動豈無端
似防遠客歌彈鋏

破例相隨過鴨欄

鱗魚不過鴨欄驛以魚隨潮上朝到孤輒回也

三百錢償一尾鰈擊鮮原不累民間
可知太守清如水
豈在懸魚絕往還

署庭蓄錦雞且一年朝來忽飛去
恒齋有詩屬

和

為爾無端惜剪刀養成六翮竟如逃
啄餘香稻新拋粒
收得雕籠舊落毛群入家雞終不亂
飛隨野鶴便能高

人間是處多羅畢文繡深林好自韜

明日吏人以錦雞來視之即昨逸去者再作一

首

勿論城市異山林性在終知去意深誤啟樊籠驚遠舉
特憐毛羽募生擒舊曾相識緣文彩待爾重來伴苦吟
從遣周防是誰過主人初不起猜心

初夏坐烟水亭望廬山二首

一奩明鏡挿芙蓉積雨初晴翠靄濃萬疊好山看未足
又添雲勢作奇峯

分明寫入畫圖工倒影看來上下同忽失水中山一半
浪紋吹皺日高風

余方輯廬山志擬入山訪舊蹟頻為雨阻恒齋
有作和之

日日開軒對翠氛勝遊偏阻鹿麋群不愁湓浦長多雨
但恐匡山化作雲紀事欲真須眼見異書難便信傳聞
一條柳標從僧乞可要籃輿累使君

芭蕉恒齋再索和

一葉復一葉自然成綠陰後先如有序舒卷豈無心漸
覺空庭窄能添曲徑深野人新得句題罷亦長吟

夜夢入廬山桃花滿谷一僧指云此杏林也因
誦樂天遊大林寺絕句夢中了了醒而以詩紀
之即用白韻

指點仙家手，自栽桃花却傍杏林開。眼前一咲真成幻，
公是身遊我夢來。

午酒初醒

兀兀醺醺坐日斜，爽神全賴閬林茶。三竿砌竹搖風影，
一箭盆蘭得氣花。夢枕易消非實境，丹爐難轉是年華。
江城節物關何事，催得遊人獨憶家。

生日書感

落拓差堪比牧之，江湖曾費十年詩。早衰鬚髮非無故，
暗減心情只自知。酒盞每逃狂客座，杖藜將赴老僧期。
尚慚習氣陰難盡，間與人爭劫後棋。

梅雨二十二韻和灌園

五月潯陽雨蛟龍正鬱蟠地浮三楚濶雲納九江寬暴
漲搖城郭餘波溢井榦鄱湖連浩淼廬阜失巒岿鳴鶴
翻依樹飛魚不上竿及時陰已動退位火疑殘天氣昏
連曉人情暖易寒蚊飛偏攪晝蛙鬧故侵官舊縷蛛穿
網新泥螳築壇竹皮流薄粉桐乳墜輕丸蕉翠宜沈綠
榴紅信渥丹濕螢光燄短鵲羽毛乾柳壞螻螿匿墻
空蜥蜴鑽案蠅沿硯水穴鼠齧盆蘭物理尋常見詩聯
貼安難爐香縈几席徽黝上衣冠不出拋芒屨無聊却
扇紈老嫌書幌暗病覺布衾單冰簟涼貪睡琴絃緩廢
彈入舟同寂莫着屐試蹠跚直欲登樓去還從倚檻看
空濛雖變態縹緲必竒觀

寓居近在庾樓下
而不得登故云

雨中廬山僧書至

社裏何時著少文書來猶未斷聲聞千峯濕翠隨行脚
帶雨開緘一屋雲

階除積水課力疏下流放之射圃隙地

尺寸階前地無源本易盈只應兼土濁那得入江清曲
折隨人意高低驗物情下流荒圃在吾枕厭蛙鳴

曉吟

江聲入戶竹風急樹影過牕山月斜誰共此時留此景
殘更煞後未啼鴉

次灌園潯陽唱和賦感見贈二十四韻

大火方司令餘威未解嚴夕陽明杲杲殘雨過靈靈書

少渾難借棋低又嬾拈移時看燕乳隨意聽魚噉圃廢
閒誰治江喧近可嫌談諧須得伴興會賴相兼洗甕晨
浮蟻推窗夜候蟾學禪根器鈍鬪韻筆鋒銛鄉信燈空
卜歸期夢代占山中俄換葛野服待分縑我氣貧旋挫
君懷老益謙悲歌翻變壯醉語誤疑謔鴻爪泥長印蛛

絲羽易黏勝遊宗炳畫往事季心鉗

灌園為吳江大司馬之子甲申以後

因亂破家

止沸吹葦冷焚枯過劫炎乾坤全晚節畊鑿合窮

欄

君有別業在玉屏山中

爛熳三秋菊崢嶸百歲栴以閒聊送老

所得詎為廉幸舍猶彈鋏成都想下簾商聲流石齒仙
氣入霜髯高浪晴湖濶竒雲夏岫添掉頭隨去住放跡
等飛潛澗壑終難返塵埃久屬厭天涯同拙滯吟罷寸

心愜

江漲八韻

頗怪連宵雨重雲尚合圍忽聞溢浦水已上庾樓磯急
鼓爭趨陣高春怒發機九龍多被譴萬馬孰能躡魚健
衝人過鷗輕踏浪飛淘沙原自濁流惡想尤肥幸勿侵
三版還防沒半扉村橋新漲好吾欲放船歸

余所居名橫張橋

晚晴

曉愁暴漲與堤平意外斜陽得晚晴小閣放教雙燕出
高梧忽帶一蟬鳴便思對酒難消暑若要看山合上城
狼籍殘雲飛不盡江空留作斷霞明

連日苦雨江勢轉盛聞小池口一帶已成巨浸

感賦

見說黃梅縣連朝浸渺瀰雨中隄盡壞江口地尤旱農
事侵饑溺天心望轉移可憐關隴旱竭澤正斯時

午後有人自廬山來云昨日白龍潭起蛟故水

暴漲

瀑布聲中雨瀉檐洪流百道走城南山橋衝斷採樵路

歸報夜來龍洗潭

廬山大雨驟至
人謂龍洗潭

曉霽望南昌歸信

十日荒城聽雨聲壞墻前後露株楹蛇因亂草當階臥
蝸是空坳積水生喜動省間看曉色夢于枕上算離程
故應乾鵲知人意已報歸期又報晴

桐陰和灌園

積雨晴來暑倍加
午陰端愛片時遮
展開疎簾三間屋
掃過空庭半月花
清露欲流濃作乳
碧天初洗澹無霞
如何葉底留蟬蛻
長聽高吟在別家

試奕次灌園韻

澹墨行疎紙
畫枰兩人隱
几亦忘情
總饒老手通盤算
只似兒曹鬪
草贏角上紛紛排陣蟻
睫前擾擾過飛蟲
莫嗤當局同遊戲
得失心空始不爭

夜熱不成寐聞秋蟲聲

循環造化機
陽壯陰已伏
不知昆蟲智
何以先草木
我亦化中人
投閒如病鹿
日長貪午枕
夜睡焉能熟
賴是

心寡營未妨群動觸徘徊風露下大火西流速須臾雞

三號細響猶斷續誰能將此意寫入玲瓏曲樂天玲瓏曲云黃雞

催曉卯時鳴白
日催年酉時沒

一草亭後補築土墻同灌園越秀賦

缺後方思補誰防未雨時大都勞版築不過當樊籬儉

與茆亭配低於菜圃宜墻頭環埤塊留看一帆移墻北
面環

堞城

月夜得南昌消息知恒齋歸期猶未定

客來依地主主去客翻留萬事盡如此一官難自由日

長愁過夏夜靜漸知秋若上滕王閣休忘庾亮樓

蟬蛻和灌園韻

不應已蛻尚名蟬彈指難留過去緣枯比老僧初入定
輕如羽客乍登仙誰云解脫非生理始信飛鳴是後天
從此蟾螂無攫意機心不上七條絃

除草

病喝貪微涼空庭方夜坐蚊雷來茂草一唱千萬和誰
能忍痒肌委身飼群餓可憐蜘蛛巧布網僅如磨暗飛
餘地多觝觸凡幾個老夫爲暫避竒計出高臥除惡務
其源攻先窟穴破披衣早我起刈草僕晨課一聞奏刀
聲快若風雨過非云迹盡掃但使勢少挫滋蔓或養奸
斯言可喻大

灌園用瓷盆斟水浮以花片畜魚苗其中作案

頭清玩索余賦之戲成二絕句

詩翁六十如兒戲一勺分江几案間少片壺中九華石

湖口李正臣蓄異石名壺中九華東坡山谷皆有詩配他剩水作殘山

魚吹花瓣亦生瀾水擊鵬飛一樣寬下得南華新注脚
藕絲針孔是竒觀

露坐待月

城頭待月月未出一綫飛光曳長白明朝有客渡湖來
湖面應添落星石

苦旱

積雨乃祈晴久晴迺望雨如何望雨意止在驅炎暑難
將田野情一概例官府江流空浩浩不救秣與黍南山

昨日雲竚待商羊舞狂飈忽捲散吹井作乾土朝來禱
龍祠會衆伐大鼓此邦歲早獲隣郡給商賈六月合嘗
新過時恐無補可憐關中旱移粟累晉楚糧船從東來
輓送方接武時方輓運入楚漕艘家家募丁壯日日候江許寧知
餽運人自迫忍饑苦天心莽難測含痛向誰語

起最早

竹亭宜早起獨自繞廊行漸覺月光淡不知天色明草
長兼露重庭曠得風輕墻缺廬山好峯峰似染成

冒風渡湖口

湖欲與江合江猶吞吐間浪頭千點白一點是鞋山

立秋夜彭澤舟中

斗柄轉城頭江聲健入秋若逢明月夜應作小孤遊水
柵依茆屋風帆帶荻洲半年遷客夢星露警扁舟

雨後登彭澤北山佛閣

眼界江天濶登臨即大觀雲根連地拔山勢讓城寬路
險苔偏滑風涼汗易乾夕陽紅欲隨好是獨凭欄

彭澤縣雨中望小孤山

龍城望小孤巖樹近可數何來雲一片遮斷蘆花渚遠
勢入微茫彭郎磯外雨

龍城彭澤驛名

七月初三夜

七月初三月如弓未上弦涼風彭澤柳遠火望江船不
作披衣坐聊爲枕柁眠傍人多咲我辜負早秋天

時余微疾

臥早

秋暑

大火初流暑未清
長川落日正西傾
氣蒸遠水浮天動
血染殘霞照夜明
蟋蟀豈知催雨意
蒹葭只慣報風聲
故鄉消息經時斷
白髮無端一夕生

發彭澤紀事和恒齋

吳楚西來太驛騷
亂帆啣尾上千艘
戍旗不動方傳箭
秋水初平尚滿槽
樂天詩江鋪滿槽水
樹豁忽疑遙岸盡
天長不覺遠山高
民間疾苦原難悉
移粟徒煩 睿慮勞

遊下石鐘題山響樓壁

牛羊滿山似可驅
鞭之不動非石乎
懸崖無根乃有株

老榦亂拔千章榆嵌空樓閣凌紫虛列仙遠邀山澤臞
落星如漚漂大孤五老拱揖朝香爐沙洲鎖斷九江脉
正面全受鄱陽湖湖波本清如碧矚下流盡被江所污
是日大風聲拔木洪濤倒挾雷霆趨須臾風止平若鋪
細聽林籟鳴笙竽石鐘非鐘扣亦愚孰辨清越分涵胡
作詩一笑解者無四壁自看江山圖

江聲閣次家聲山壁間舊韻

勿將架構擬人工百尺高樓萬里風彭蠡遠帆斜出口
匡廬晴翠淡粘空涼生欄檻秋先爽助得江山句轉雄
好是不題名姓在免教僧費碧紗籠

王令詒自吳淞至湓城連牀話舊驚聞錢越江

學士京邸訃信悲感交集即事成詩

急雨渡江來蕭然挾秋氣清風偕好友一夕千里至殘
燈照黃昏梧葉響階砌荒城忽連榻此會出不意可憐
窮旅人一咲天併忌新歡猶未極旋隕傷心淚憶昨客
京華青衫最憔悴髯公獨好我不與時並棄往往合酒
徒開懷使沈醉江湖莽回首已若隔生事那復承訃音
嗚呼別離地君頭絲欲換余齒豁已隊浮生知幾何聚
散逆難計吟蛩耿敗壁達旦兩無寐

宋中丞牧仲自江西移撫江蘇邀余入幕投詩

辭之

此遊本意因廬嶽半載後巡未謁公擬束歸裝向湓口

送移旌節赴江東空煩使命雲霄上豈有人才道路中
敢謂山林便野性倦飛無分借秋風

同王令詒泛甘棠湖至城南謁陶白祠

艇子打兩槳剪風如燕梢白鷺導我前行行入蘆茭古

祠常敬不待遊人敲門前十畝田

按碑記云有田十畝即以給居僧

夏旱土不膠牛宮柱欹側旁種苦菜匏居僧老業農叱

犢犁黃茅苦云生理拙歲歲山田燒入門風氣道沙水

互裹包湖光隱林杪山色遮城堦天然好位置結構宜

槽櫟緬懷二先生潛見各一爻潔身苟有歸千載應神

交如何斗室中湫隘隣榻庖誰能移佛座勿令名實淆

正室三間中設大士像而二公祠
反在其左與僧廚偏處殊不稱也

送令詒歸青浦卽次留別原韻

遠別無善地况乃當淪城送客不思鄉此語非人情鄉
心我久發非緣送君生輸君後我來竟復先我行大江
秋滾滾日氣昏離程斷雁思舊侶聞鷗狎新盟茫茫對
岐路歸計何時成

敬業堂詩集卷十四